

薛立齋醫案全集

辛酉孟夏中澣

薛齋署



女科撮要前序

余聞軒岐事業遐哉遠矣其言說流布至今未盡泯也然傳者或效或否豈其書不可盡信耶是信乎人馬耳語曰醫不通儒不可以言醫其以是歟太醫院使薛君立齋雅近於儒其以醫名世也固宜君嘗以日所施活者述其病原詳其脉候著其方驗有所得輒錄之積彙成帙標曰家醫醫錄他日呈于

大司馬中丞約菴翁翁覽而善之授余以錄諸梓且命申其說余曰嘻是仁者之心哉或曰何謂也夫醫術也而心術觀焉世之醫者得一方輒以自秘取一效即以自多人病在身而渠病在心且弗之樂是尚可以言醫薛君以名醫致身不自秘而以示人將欲致人人於名醫中丞翁撫綏畿輔振衰剔弊既登斯民仁壽之域復布其醫書欲壽斯民於無窮茲非仁者之事哉是宜梓之以訓于世觀者毋徒執其方而求得其心焉則是錄也其可傳矣

嘉靖戊申春正月吉劔江存所范慶書

上海大成書局印行

女科撮要目錄

上卷

經候不調

經漏不止

經閉不行

帶下

血分水分

小便出血

熱入血室

師尼寡婦寒熱

歷節痛風

流注

癰癧

乳癰乳巖

血風瘡

臙瘡

陰瘡

各症方藥

下卷

保胎

小產

保產

于死腹中

胎衣不出

交骨不開陰門不開子宮不收

產後腹痛

產後血暈并失血

產後發瘧

產後便血

產後大便不通

產後寒熱

產後咳嗽

產後瘧疾

產後泄瀉

各症方藥

女科撮要目錄

經候不調

經曰飲食入胃遊溢精氣上輸於脾脾氣散精上歸於肺通調水道下輸腰膝水經四布五經並行故心脾平和則經候如常苟或七情內傷六淫外侵飲食失節起居失宜脾胃虛損則月經不調矣若先期而至者有因脾經血燥有因脾經鬱滯有因肝經怒火有因血分有熱有因勞役火動其過期而至者有因脾經血虛有因肝經血少有因氣虛血弱主治之法脾經血燥者加味逍遙散脾經鬱滯者歸脾湯肝經怒火者加味小柴胡湯血分有熱者加味四物湯勞役火動者補中益氣湯脾經血虛者人參養榮湯肝經血少者六味地黃丸氣虛血弱者八珍湯蓋血生於脾土故云脾統血凡血病當用苦甘之劑以助其陽氣而生陰血俱屬不足大凡肝脾血燥四物為主肝脾血弱補中益氣為主肝脾鬱結歸脾湯為主肝經怒火加味逍遙為主

治驗 肝經怒火風熱等症附

一婦人內熱作渴飲食少思腹內近左初如雞卵漸大四寸許經水三月一至肢體消瘦齒頰似瘡脉洪數而虛左關尤甚此肝脾鬱結之症外貼阿魏膏午前用補中益氣湯午後以加味歸脾湯兩月許肝火少退脾土少健乃與前湯送六味地黃丸午後又用逍遙散送歸脾丸又月餘日用蘆薈丸二服空心以逍遙散下日晡以歸脾湯下喜其謹疾調理年餘而愈

一婦人腹內一塊不時上攻或痛作聲吞酸痞悶月經不調小便不利二年餘矣面色青黃相兼余作肝脾氣滯以六君子加芍歸柴胡炒連木香吳萸各少許二劑却與歸脾湯下蘆薈丸三月餘肝脾和而諸症退又與調中益氣加茯苓丹皮中氣健而經自調

一婦人發熱口乾月經不調兩腿無力服祛風滲濕之劑腿痛體倦二膝浮腫經事不通余作肝脾腎三

經血虛火燥症名鶴膝風用六味八味二丸兼服兩月形體漸健飲食漸進膝腫漸消不半載而痊前症若脾胃虛寒腿足軟痛或足膝枯細用八味丸若飲食過多腿足或臂內痠脹或浮腫作痛用補中益氣加茯苓半夏主之

一婦人性沉靜勤於女工善怒小腹內結一塊或作痛或痞悶月經不調恪服伐肝之劑內熱寒熱胸膈不利飲食不甘形體日瘦牙齦蝕爛此脾土不能生肺金肺金不能生腎水腎水不能生肝木當滋化源用補中益氣六味地黃至仲春而愈

松江太守何恭人性善怒腹聚一塊年餘形體骨立倏熱往來膠蝕透腮或泥春旺木尅土仍行伐肝時季冬肝脉洪數按之弦緊餘脉微弱余曰洪數弦緊肝經真氣虛而邪氣實也自保不及何能尅土况面色青中隱白乃腎水不足肝木虧損肺金尅制惟慮至春木不能發生耳勉用壯脾胃滋腎水之劑肝脉悉退後大怒耳內出血肝脉仍大按之如無煩燥作渴此無根之火以前藥加肉桂二劑肝脉仍斂熱渴頓退復因大怒以致飲食不進果卒於季冬辛巳日此木衰弱而金尅尅信夫

一婦人經候過期發熱倦怠或用四物黃連之類反兩月一度且少而成塊又用峻藥通之兩目如帛所蔽余曰脾為諸陰之首目為血脉之宗此脾傷五臟皆為失所不能歸於目矣遂用補中益氣濟生歸脾二湯專主脾胃年餘尋愈

一婦人兩鬢發痛後及太陽面青善怒余作胆經風熱用選奇湯合道遙散加山梔天麻黃芩半夏黃芩而愈此症失治多致傷目或兩耳出膿則危矣

一婦人耳鳴內熱經行不調肢體倦怠飲食無味余以為肝脾虛熱用四君加柴胡山梔丹皮甘草而愈一婦人素勤苦冬初患咳嗽發熱久而吐血盜汗經水兩三月一至遍身作痛或用化痰降火口噤筋攣

謂余曰何也余曰此血虛而藥益損耳遂用加減八味丸及補中益氣加麥門五味山藥治之年餘而痊一婦人耳內或耳後項側作痛寒熱口苦月經不調余以為肝火氣滯而血凝用小柴胡加山梔川芎丹

皮治之諸症悉退

一婦人年四十。素性急。先因飲食難化。月經不調。服理氣化痰藥。反肚腹膨脹。大便泄瀉。又加烏藥。蓬朮。肚腹腫脹。小便不利。加猪苓。澤瀉。痰喘氣急。手足厥冷。頭面肢體腫脹。指按成窟。脉沉細。右寸為甚。余曰。此脾肺之氣虛寒。不能通調水道。下輸膀胱。滲泄之令不行。生化之氣不運。即東垣所云。水飲留積。若土之在雨中。則為泥矣。得和風暖日。水濕去而陽化自然。萬物生長。喜其脉相應。遂與金匱加減腎氣丸料。服之。小便即通。數劑腫脹消半。四肢漸溫。自能轉側。又與六君加木香。肉桂。炮薑。治之全愈。後不戒七情飲食。即為泄瀉。仍用前藥。加附子五分而安。

一婦人飲食。每用碗許相加。非大便不實。必吞酸噯腐。或以為胃火。用二陳黃連枳實。加內熱作嘔。余曰。此未傳寒中。故噯氣吞酸。脹滿痞悶。不信。乃作火治。虛症。並至月經不止。始信。余以六君加炮薑。木香。數劑。元氣漸復。飲食漸進。又以補中益氣。加炮薑。木香。茯苓。半夏。數劑。全愈。後因飲食勞倦。兼之怒氣。飲食頓少。元氣頓怯。用前藥。更加發熱。誠似實火。脉洪大。按之而虛。兩尺如無。此命門火衰。用補中益氣。加薑桂。及八味丸。兼服兩月餘。諸症悉愈。此症若因中氣虛弱者。用人參。理中湯。或六君子。加木香。炮薑。不應。用左金丸。或越鞠丸。虛寒者。加附子。或附子理中湯。無有不愈。

一婦人素有頭暈。不時而作。月經遲而少。余以為中氣虛。不能上升。而頭暈。不能下化。而經少。用補中益氣湯。而愈。後因勞而仆。月經如湧。此勞傷火動。用前湯。加五味子一劑。服之即愈。前症雖云亡血過多。氣無所附。實因脾氣虧損耳。

一婦人年四十。勞則足跟熱痛。余以為陰血虛極。急用聖愈湯。而痊。後遍身搔痒。誤服風藥。發熱抽搦。肝脉洪數。此乃肝家血虛火盛。而生風。以天竺。胆星。為丸。用四物。麥門。五味。苓。連。芩。草。山。梔。柴。胡。煎。送。而愈。一婦人兩足發熱。日晡益甚。小便自遺。或時不利。余以為肝熱陰挺。不能約制。于前用白朮。茯苓。丹皮。澤瀉。各五分。乾山藥。山茱。麥門。各一錢。熟地。四錢。酒炒。黑黃。柏。七分。知母。五分。不數劑。而諸症悉愈。若用分

利之劑愈損真陰必致不起

一婦人月事未期而至發熱自汗服清熱止汗之劑反作渴頭痛手掉身麻此因肝經風熱用柴胡炒芍連炒山梔歸芍生地丹皮各一錢參苓苓木各一錢五分川芎七分甘草五分二劑其汗全止更以補中益氣而愈凡發熱久者陽氣亦自病須調補之

一婦人經行後勞役失調忽然昏愴面赤吐痰此元氣虛火妄動急飲童便神思漸爽更用參苓各五錢芍歸各三錢玄參柴胡山梔炙草各一錢一劑又用逍遙散加五味麥門稍定但體倦面黃此脾土真虛之色也又以十全大補加五味麥門治之而愈若投以發散之劑禍在反掌慎之

西賓錢思習子室年三十尚無嗣月經淋瀝無期夫婦異處者幾年矣思習欲為娶妾以謀諸余余曰此鬱怒傷肝脾虛火動而血不歸經乃肝不能藏脾不能攝也當清肝火補脾氣遂與加味歸脾逍遙二藥四劑送至其家仍告其姑曰服此病自愈而當受胎妾可無娶也果病愈次年生子

一婦人多怒經行或數日或半月即止三年後淋瀝無期肌體痿瘦口乾內熱盜汗如洗日晡熱甚余用參苓歸木伏神遠志棗仁麥門五味丹皮龍眼肉炙草柴胡升麻治之獲痊此症先因怒動肝火血熱妄行後乃脾氣下陷不能攝血歸源故用前約若胃熱亡津液而經不行宜清胃若心火亢甚者宜清心若服燥約過多者宜養血若病久氣血衰宜健脾胃

一婦人年五十內熱晡熱經水兩三月一來此血虛而有熱用逍遙散加山茱治之而愈若兼有痰作渴或小便不調或頭暈白帶宜用腎氣丸

一婦人氣血素虛經行不調飲食少思日晡熱甚用十全大補加山茱山藥丹皮麥門五味而愈次年秋患寒熱或用清脾飲而元氣愈弱余乃以前藥而愈

一婦人生七胎矣月經不調兩足發熱手餘而身亦熱勞則足痠痛又年許唇腫裂痛又半年唇裂見血形體瘦倦飲食無味月水不通唇下腫如黑棗或用通經丸等藥而死

一婦人善怒經不調。唇腫裂。服消毒藥。唇脹出血。年餘矣。余曰。當培養脾胃。以滋化濕。不信。仍服前藥。又追蝕。狀如翻花瘤而死。

一膏粱之婦。產後月經不調。唇裂內熱。每煖作。服寒涼之劑。後不時出水。余用加味清胃散而愈。後值春令。兼怒。唇口腫脹。寒熱作。嘔痰甚少。食用小柴胡。加山梔。茯苓。桔梗。諸症頓愈。但內熱仍作。乃以加味道遙散調理而安。

一婦人性善怒。產後唇腫內熱。用清熱敗毒。唇口腫脹。日晡熱甚。月水不調。用降火化痰。食少作嘔。大便不實。唇出血。水用理氣消導。胸膈痞滿。頭目不清。唇腫經閉。用清胃行血。肢體倦怠。發熱煩躁。涎水湧出。欲用通經之劑。余曰。病本七情。肝脾虧損。數行攻伐。元氣益虛。故耳。法當補陰益陽。遂以加味歸脾湯。加味道遙散。補中益氣湯。如法調治。元氣漸復。唇瘡亦愈。後因怒。寒熱耳痛。胸膈脹悶。唇煖腫甚。此是怒動肝火而血傷。遂用四物。合小柴胡。加山梔。頓愈。後又怒。脇乳作脹。肚腹作痛。嘔吐酸涎。飲食不入。小水不利。此是怒動肝木。尅脾土。乃用補脾氣。養脾血而愈。又因勞役。怒氣飲食失時。發熱喘渴。體倦不食。去血如崩。管腫熾甚。此是肝經有火。脾經氣虛。遂用補中益氣。加炒黑山梔。芍藥。丹皮。而愈。此症每見。但治其瘡。不固其本。而死者多矣。

經漏不止

經云。陰虛陽搏。謂之崩。又云。陽絡傷。血外溢。陰絡傷。血內溢。又云。脾統血。肝藏血。其為患。因脾胃虛損。不能攝血。歸源。或因肝經有火。血得熱而下行。或因肝經有風。血得風而妄行。或因怒動肝火。血熱而沸騰。或因脾經鬱結。血傷而不歸經。或因悲哀太過。肥絡傷而下崩。治療之法。脾胃虛弱者。六君子湯。加當歸。川芎。柴胡。脾胃虛弱者。補中益氣湯。加酒炒芍藥。山梔。肝經血熱者。四物湯。加柴胡。山梔。芍藥。肝經怒火者。小柴胡湯。加山梔。芍藥。丹皮。脾經鬱火者。歸脾湯。加山梔。柴胡。丹皮。哀傷胞絡者。四君子湯。加柴胡。升麻。山梔。故東垣丹溪諸先生云。凡下血症。須用四君子以收功。斯言厥有旨哉。若大吐血後。母以脈診。當

急用獨參湯救之。其發熱潮熱咳嗽脈數乃是元氣虛弱假熱之脉也。尤當用人參之類。此等症候無不由脾胃先損而患。故脉洪大。察其中有胃氣受補可救。設用寒涼之藥。復傷脾胃生氣。使血反不歸源也。

治驗吐血等症附

一婦人年將七十。素有肝脾之症。每作則飲食不進。或胸膈不利。或中脘作痛。或大便作瀉。或小便不利。余用逍遙散加山梔。茯神。遠志。木香。而愈。後憂女孀居。不特吐紫血。每作先倦。急煩熱。以前藥加炒黑黃連三分。吳茱二分。頓愈。復因怒吐赤血甚多。躁渴垂死。此血脫也。法當補氣。乃用人參一兩。苓朮當歸各三錢。陳皮炮黑乾薑各二錢。炙草木香各一錢。一劑頓止。信藥有回生之功。不可委於天命也。

一婦人年六十。有四。久鬱怒。頭痛寒熱。春間乳內時痛。服流氣飲之類。益甚。不特有血如經行。又大驚恐。飲食不進。夜寐不寧。乳腫及兩脇焮痛。如炙。午後色赤。余以為肝脾鬱火血燥。先以逍遙散加酒炒黑龍胆一錢。山梔一錢五分。二劑。腫痛頓退。又二劑而全消。再用歸脾。加炒梔貝母。諸症悉愈。

一婦人久患血崩。肢體消瘦。飲食到口。但聞腥臊。口出津液。強食少許。腹中作脹。此血枯之症。肺肝脾胃虧損之患。用八珍湯。烏賊魚骨圓。兼服兩月。而經行百餘劑。而康寧如舊矣。

一婦人性急躁。溼歷後吐血發熱。兩脇脹痛。日晡為甚。余以為怒氣傷肝。氣血俱虛。遂朝用逍遙散。倍加炒黑山梔。黃柏。貝母。桔梗。麥門。五味。又以歸脾湯。送地黃丸。諸症並愈。

一婦人素勤苦。因喪子。飲食少思。忽吐血甚多。而自止。此後每勞則吐數口。瘵症已具。形體甚倦。午前以補中益氣。午後以歸脾湯。送地黃丸。而愈。

一女子素鬱結。胸滿食少。吐血面赤。用地黃丸。及歸脾。加山梔。貝母。芍藥。而愈。

一婦人面黃。或赤。時覺腰間或臍下作痛。四肢困倦。煩熱不安。其經若行。先發寒熱。兩肋如束。其血如崩。

此脾胃虧損。元氣下陷。與相火濕熱所致。用補中益氣。加防風。芍藥。炒黑黃柏。間以歸脾湯。調補化源血。

自歸經矣。

一婦人因怒崩血久不已面青黃而或赤此肝木制脾土而血虛也用小柴胡合四物以清肝火生肝血又用歸脾補中二湯以益脾氣生肝血而瘳此症若因肝經有風熱而血不寧者用防風一味為丸以兼症之藥煎送或肝經火動而血不寧者用條芩炒為丸以兼症之藥煎送無有不効

一婦人性急每怒非太陽耳項喉齒胸乳作痛則胸滿吞酸吐瀉少食經行不止此皆肝火之症肝自病則外症見土受尅則內症作若自病見用四物加白木茯苓柴胡炒梔炒龍胆若內症作用四君加柴胡芍藥神麩吳茱炒過首連諸症漸愈惟月經不止是血分有熱脾氣尚虛以逍遙散倍用白木茯苓陳皮又以補中益氣加酒炒芍藥兼服而調

乾內錢氏年五十歲辛丑患崩諸藥罔效壬寅八月身熱肢痛頭暈涕出吐痰少食眾作火治轉熾絕粒數日淹淹伏枕僅存呼吸兄方浙歸診之謂脾胃虛寒用八味丸料一劑便急煎服然胃虛久始下咽翌早遂索粥數匙再劑食倍熱減痛止兼服八味丸良愈矣卯秋因勞役憂怒甲辰春夏崩復作六月二十日胸飽發熱脊痛腰不可轉神氣怫鬱或作內傷或作中暑崩水沸騰兼以血煩渴引飲粒米不進至七月十三日晝夜暈惰時作時止計無所出仍屈兄診之脉洪無倫按之微弱此無根之火內真寒而外假熱也以十全大補加附子一劑暈止食粥三四匙崩血漸減日服八味丸始得全愈乾山妻兩構危疾命懸須臾荷兄遠救誠解倒懸之急處方神良知無出此野人懷恩姑俟後日玉環之報云爾嘉靖甲辰季秋表弟方乾頓首拜書

大化內患月事不期崩血昏憤發熱不寐或謂血熱妄行投以寒劑益甚或謂胎成受傷投以止血亦不効乃敬延先生診之曰此脾氣虛弱無以統攝故耳法當補脾而血自止矣用補中益氣加炮薑不數劑而驗惟終夜少睡驚悸另服八物湯更不効叩諸先生曰雜矣乃與歸脾湯加炮薑以補心脾遂如初僅叙其梗槩以附醫按俾後之患者得有所取法云嘉靖甲辰孟冬晚生歸大化頓首拜書

夫經水陰血也。屬衝任二脉。主上為乳汁。下為月水。其為患有因脾虛而不能生血者。有因脾鬱傷而血耗損者。有因胃火而血消燦者。有因脾胃損而血少者。有因勞傷心而血少者。有因怒傷肝而血少者。有因腎水不能生肝而血少者。有因肺氣虛不能行血而閉者。治療之法。若脾虛而不行者。調而補之。脾鬱而不行者。解而補之。胃火而不行者。清而補之。脾胃損而不行者。調而補之。勞傷心血而不行者。靜而補之。怒傷肝而不行者。和而補之。肺氣虛而不行者。補脾胃。腎虛而不行者。補脾肺。經云。損其肺者益其氣。損其心者調其榮衛。損其脾者調其飲食。適其寒溫。損其肝者緩其中。損其腎者益其精。審而治之。庶無誤矣。

治驗

一婦人停食。飽悶發熱。或用人參養胃湯。益甚。再用木香檳榔丸。泄瀉吐痰。腹中成塊。飲食少。思又用二陳黃連厚朴之類。前症益甚。腹脹不食。月經不至。余以為中氣虧損。用補中益氣。加茯苓半夏。三十餘劑。脾胃健而諸症愈。又二十餘劑。而經自行。前症若脾虛不能消化。飲食者。宜用六君子湯。補而消之。虛寒者。加砂仁木香炮薑。溫而補之。其食積成形者。以前藥煎送保和丸。大抵食積痞塊。症為有形。所謂邪氣勝則實。真氣奪則虛。惟當養正。開邪。而積自除矣。雖然。堅者削之。客者除之。胃氣未虛。或可少用。若病久虛乏者。則不宜用。

一婦人飲食後。或腹脹。或吞酸。服枳朮丸。吞酸益甚。飲食日少。胞膈痞滿。腿內酸痛。畏見風寒。又服養胃湯。一劑。腿內作痛。又二劑。腿浮腫。月經不行。余以為鬱結所傷。脾虛濕熱。下注。侵晨用四君子歸二陳。午後以前湯送越鞠丸。飲食漸進。諸症漸愈。又用歸脾八珍二湯。兼服兩月餘。而經行。

一婦人性沉。多慮。月經不行。胸滿少食。或作脹。或吞酸。余以為中氣虛寒。用補中益氣。加砂仁香附煨薑。二劑。胸膈和而飲食進。更以六君。加芍歸貝母桔梗生薑大棗。數劑。脾胃健而經自調矣。

一婦人素有胃火。服清胃散而安。後因勞。沒躁渴。內熱。肌肉消瘦。月經不行。此胃火消燦。陰血用逍遙散。

加丹皮炒枳以清胃熱用八珍湯加茯苓遠志以養脾血而經自行矣

一婦人久患瘧形體怯弱內熱補熱自汗盜汗飲食少思月事不行服通經丸虛症悉具此因虛而致瘧疾因瘧而致經閉用補中益氣及六味地黃丸各百餘劑瘧愈經自行

一婦人久患瘧瘧作則經不行形虛脉大頭癢懶食大便泄瀉小便淋漓口乾唇裂內熱腹脹皆元氣下陷相火合病用補中益氣湯治之尋愈惟不時頭痛仍加蔓荊子而痛止又兼用六味地黃丸而經行

一婦人因勞耳鳴頭痛體倦此元氣不足用補中益氣加麥門五味而痊三年後得子因飲食勞倦前症益甚月經不行補熱內熱自汗盜汗用六味地黃丸補中益氣湯頓愈前症若因血虛有火用四物加山

梔柴胡不應八珍加前藥若氣虛弱用四君子若怒耳便聾或鳴者實也小柴胡加芍歸山梔虛用補中益氣加山梔若干前甚作火治用小柴胡加炒連炒枳氣虛用補中益氣于後甚作血虛用四物加白木

茯苓若陰虛火動或兼痰甚作渴必用地黃丸以壯水之主經云頭痛耳鳴九竅不利腸胃之所生也脾胃一虛耳目九竅皆為之病

一婦人胃氣素弱為哭母吐血咳嗽發熱盜汗經水三月不行余以為悲則傷肺思則傷脾遂朝服補中益氣加桔梗貝母知母夕用歸脾湯送地黃丸而愈

帶下

或因六淫七情或因醉飽房勞或因膏粱厚味或服燥劑所致脾胃虧損陽氣下陷或濕痰下注蘊積而成故言帶也凡此皆當壯脾胃升陽氣為主佐以各經見症之約若屬肝則青小柴胡加山梔或濕熱壅滯小便赤澀龍胆瀉肝湯屬心則赤小柴胡加黃連山梔當歸屬肺則白補中益氣加山梔屬脾則黃六君子加山梔柴胡不應歸脾湯屬腎則黑六味地黃丸若氣血俱虛八珍湯陽氣下陷補中益氣湯濕痰下注前湯加茯苓半夏蒼朮黃柏氣虛痰飲下注四七湯送腎氣丸

治驗

一婦人年踰六十。內熱口乾勞則頭暈。吐痰帶下。或用化痰行氣前症益甚。飲食愈少。肢體或麻。恪服祛風化痰。肢體常麻手足或冷或熱。日漸消瘦。余曰。症屬脾氣虛弱而不能生肺。祛風之劑復損諸經也。當滋化源。遂用補中益氣加茯苓半夏炮薑二十餘劑。脾氣漸復。飲食漸加。諸症頓愈。

一婦人腹脹脇痛。內熱肺熱。月經不調。肢體痠麻。不時吐痰。或用清氣化痰。喉間不利。帶下青黃。腹脇膨脹。用行氣之劑。胸膈不利。肢體時麻。此鬱怒傷損肝脾。前藥益甚也。朝用歸脾湯以解脾鬱。生脾氣。夕用加味逍遙散以生肝血清肝火。兼服百餘劑而諸症愈。

一婦人瘡久兼之帶下。發後口乾倦甚。余用七味白朮散加麥門五味作大劑煎。與恣飲再發稍可。乃用補中益氣加茯苓半夏十餘劑而愈。凡截瘡余常以參朮各一兩生薑四兩煨熟煎服即止。或以大劑補中益氣加煨薑其功尤捷。

一婦人頭暈唾痰胸滿氣喘。得食稍緩。苦於白帶二十餘年矣。諸藥不應。余曰。此氣虛而痰飲也。飲愈而帶始愈。遂用六味地黃丸不月而驗。

一婦人耳鳴胸痞內熱口乾咳中。若有一核吞吐不利。月經不調兼之帶下。余以為肝脾鬱結。用歸脾湯加半夏山梔升麻柴胡間以四七湯下白丸子而愈。

一婦人吞酸胸滿食少便泄。月經不調。法服製清氣化痰丸。兩膝漸腫。寒熱往來。帶下黃白。面黃體倦。余以為脾胃虛濕熱下注。用補中益氣倍用參朮加茯苓半夏炮薑而愈。若因怒發熱少食。或兩腿赤腫。或指縫常濕。用六君加柴胡升麻。及補中益氣。

一婦人帶下四肢無力。勞則倦怠。余曰。四肢者土也。此屬脾胃虛弱。濕痰下注。遂以補中益氣濟生歸脾二藥治之而愈。

一婦人年踰六十。帶下黃白。因怒胸膈不利。飲食少思。服消導利氣之藥。反痰喘胸滿。大便下血。余曰。此脾氣虧損不能攝血歸源也。用補中益氣加茯苓半夏炮薑四劑。諸症頓愈。又用八珍加柴胡炒梔而安。

血分水分

二症或因飲食起居失養或因六淫七情失宜以致脾胃虧損不能生發統攝氣血非違行失常道若先因經水斷絕後至四肢浮腫小便不通血化為水名曰血分宜用椒仁丸治之若先小便不利後至身面浮腫經水不通水化為血名曰水分宜用葶藶丸治之此屬形氣不足邪淫隧道必用此藥以宣導其邪而佐以輔補元氣庶使藥力有所仗而行則邪自不能容而真氣亦不至於復傷矣。

治驗

一婦人月經不調晡熱內熱飲食少思肌體消瘦小便頻數服濟陰丸月經不行四肢浮腫小便不通余曰此血分也朝用椒仁丸夕用歸脾湯漸愈乃以人參丸代椒仁丸兩月餘將愈專用歸脾湯五十餘劑而痊

一癯婦月經不調小便短少或用清熱分利之劑小便不利三月餘身面浮腫月經不通余曰此水分也遂朝用葶藶丸夕用歸脾湯漸愈乃用人參丸間服而愈已上二症作脾虛水氣用分利等藥而死者多矣惜哉

小便出血

婦人小便尿血或因膏粱炙煇或因醉飽入房或因飲食勞役或因六淫七情以致元氣虧損不能統攝歸源若因怒動肝火者用加味道遙散調送髮灰肝經風熱者送子芩丸久而血虛者用八珍送髮灰若膏粱積熱者用清胃散加槐花甘草房勞所傷者用六君加柴胡升麻風熱所傷者用四君加防風枳殼凡久而虧損元氣者用補中益氣為主鬱結傷脾者用濟生歸脾為主

治驗

一婦人尿血因怒氣寒熱或頭痛或脇脹用加味道遙諸症稍愈惟頭痛此陽氣虛用補中益氣加蔓荊子而痊後鬱怒小腹內疝痛次日尿血甚仍用前散加龍胆草并歸脾湯將愈因飲食所傷血仍作微

夜不寐心中不寧此脾血尚虛用前湯而痊

一婦人尿血久用寒涼止血藥面色痿黃肢體倦怠飲食不甘補熱作渴三年矣此前藥復傷脾胃元氣下陷而不能攝血也蓋病久鬱結傷脾用補中益氣以補元氣用歸脾湯以解脾鬱使血歸經更用加味道遙以調養肝血不月諸症漸愈三月而痊

熱入血室

婦人傷寒或勞役或怒氣發熱適遇經行以致熱入血室或血不行或血不止令人晝則明了安靜夜則譫語如見鬼狀用小柴胡加生地黃血虛者用四物加生地柴胡切不可犯胃氣若病既愈而血未止或熱未已元氣素弱用補中益氣脾氣素鬱用濟生歸脾血氣素弱用十全大補庶無誤矣

治驗

一婦人經行感冒風寒日間安靜至夜譫語用小柴胡加生地治之頓安但內熱頭暈用補中益氣加蔓荊子而愈後因怒惱寒熱譫語胸脇脹痛小便頻數月經先期此是肝火血熱妄行用加味道遙加生地而愈

一婦人因怒寒熱頭痛譫言妄語日晡至夜益甚而經暴至蓋肝藏血此怒動火而血妄行用加味道遙散加生地治之神思頓清但食少體倦月經未已蓋脾統血此脾氣虛不能攝用補中益氣治之月經漸止一婦人懷抱素鬱感冒經行譫語服發散之劑不應用寒涼降火前症益甚更加月經不止肚腹作痛嘔吐不食痰涎自出此脾胃虛寒用香砂六君脾胃漸健諸症漸退又用歸脾湯而全愈

師尼寡婦寒熱

宋諸氏療師尼寡婦別製方藥謂獨陰無陽致血氣交爭乍寒乍熱如瘧或腰背作痛而寒熱其肝脉弦出寸口是其症也若室女出嫁愆期而寒熱亦然蓋男子精盛則恩室女子血盛以懷胎此天地自然之理也治以小柴胡加生地久而血虛佐以四物若兼怒動肝火而寒熱者佐以加味道遙散若兼虧損肝

經而寒熱者佐以八珍湯若兼虧損元氣而寒熱者佐以補中益氣湯若兼鬱傷脾氣而寒熱者佐以濟生歸脾湯此症多兼經候不調當詳孰為緩急而治之

治驗

一寡婦因怒致不時寒熱久而不已肝脉弦緊用小柴胡加生地治之而愈但見風寒熱仍作此是脾胃氣虛用加味歸脾補中益氣二湯兼服而止

一婦人因夫經商久不歸發寒熱月經旬日方止服降火涼血反潮熱內熱自汗盜汗月經頻數余曰熱汗氣血虛也經頻肝脾虛也用歸脾湯六味丸而愈當治兼症既愈而寒熱當仍用本症藥

一室女寒熱左手脉弦長而出寸口用小柴胡加生地烏梅治之而愈既嫁而諸症悉痊

一室女久患寒熱月經不調先以小柴胡加生地治之少愈更以生地黃丸而痊

一放出宮女年踰三十兩胯作痛肉色不變大小便中作痛如淋登廁尤痛此瘀血清入隧道為患乃男女失合之症也難治後潰不斂又患瘰癧而殁此婦為吾鄉湯氏妾湯為商常在外可見此婦在內久懷憂鬱及出外又不能如願是以致生此疾愈見瘰癧流注乃七情氣血損傷不可用攻伐皎然矣按精血篇云女人天癸既至踰十年無男子合則不調未踰十年思男子合亦不調不調則舊血不出新血誤行或清而入骨或變而為腫或雖合而難子合多則溼枯虛人產乳眾則血枯殺人觀其精血思過半矣一室女年十七瘰癧久不愈天癸未通發熱咳嗽飲食少思或欲用通經丸余曰此症潮熱經候不調者不治所喜脉不濇且不潮熱尚可治但養氣血益津液其經自行感於速効仍用之余曰非其治也此乃慄悍之劑大助陽火陰血得之則妄行脾胃得之則愈虛經果通而不止飲食愈少更加潮熱遂致不救

歷節痛風 卽白虎歷節風

歷節痛或因飲食起居失節或因七情六淫失宜以致脾胃虧損腰理不密外邪所侵或為肝火內動肝血耗損或為肢體疼痛或為肢節難伸或為卒然掣痛或為走痛無常或內熱瞞熱自汗盜汗或經候不

調飲食不甘。其治法屬風邪者。小續命湯。走注疼痛者。漏蘆散。骨節疼痛者。四生丸。濕熱痛者。清燥湯。兼痰佐以二陳。肝火者。加味道道。散加羌活。川芎。脾鬱者。加味歸脾。加羌活。川芎。血虛者。四物加羌活。川芎。氣虛者。四君加羌活。川芎。氣血俱虛者。八珍加羌活。川芎。月經先期而痛者。加味道道。散為主。月經過期而痛者。補中益氣為主。大抵痛而不敢按者。屬病氣。元氣俱實也。手按而痛緩者。病氣元氣俱虛也。若勞役而作痛者。元氣虛也。飲食失宜而作痛者。脾胃虛也。怒惱而作痛者。肝火也。經行而作痛。血虛也。凡此皆固元氣為主。而佐以治病之藥。

治驗

一婦人自汗盜汗。發熱。胸熱。體倦。少食。月經不調。吐痰甚多。二年矣。遍身作痛。天陰風雨益甚。用小續命湯而痛止。用補中益氣。加味歸脾二湯。三十餘劑而愈。自汗等症。皆鬱結傷損脾氣。不能輸養諸臟所致。故用前二湯。專主脾胃。若用寒涼降火。理氣化痰。復傷生氣。多致不起。

一婦人因怒。月經去多。發熱作渴。左目緊小。頭項動掉。四肢抽搐。遍身疼痛。此怒動肝火。肝血虛而内生風。用加味道道。加釣藤。數劑。諸症漸愈。又用八珍湯調理而痊。

一婦人月經先期。素有痛症。每勞必作。用衆手重按痛稍止。此氣血虛而有火。用十全大補。加獨活。治之而痛痊。用六味丸。道道散。而經調。

一婦人歷節作痛。發熱作渴。飲食少。思月經過期。諸藥不應。脈洪大。按之微細。用附子八物四劑而痛止。用加味道道。而元氣復。六味丸。而月經調。

一婦人體肥。腠素內熱。月經先期。患痛風。下身微腫。痛甚。小便頻數。身重。脈緩。症屬風濕。而血虛有熱。先用羌活勝濕湯。四劑。腫痛漸愈。用清燥湯。數劑。小便漸清。用加味道道。十餘劑。內熱漸愈。為飲食停滯。發熱。仍痛。面目浮腫。用六君。加柴胡。升麻。而愈。又因怒氣。小腹痞悶。寒熱嘔吐。此木侮脾土。用前藥。加山梔。木香。而安。惟小腹下墜。以欲去後。此脾氣下陷。用補中益氣。而愈。後因勞役。怒氣作嘔。吐痰。遍身腫痛。月

經忽來寒熱用六君加柴胡山梔以扶元氣清肝心腫痛嘔吐悉退用補中益氣以升陽氣健營氣月經

寒熱悉瘳

一婦人飲食少思畏見風寒患痛風嘔吐寒熱脉弦緊用附子八物四肢痛愈用獨活寄生腰痛亦痊惟

兩膝腫痛用大防風而消加味歸脾逍遙而元氣復

婦人流注或因憂思鬱怒虧損肝脾或因產後勞傷復傷氣血以致營氣不從逆於肉理或因腠理不密
外邪客之或濕痰流注或跌撲血滯或產後惡露益氣流而注血注而凝或生於四肢關節或流於胸腹
腰臂或結塊或漫腫皆屬虛損急用葱熨及益氣養榮湯則未成自消已成自潰若久而腫起作痛肢體
倦怠病氣有餘形氣不足尚可治若漫腫微痛屬形氣病氣俱不足最難治不作膿或膿成不潰氣血虛
也用八珍湯憎寒畏寒陽氣虛也十全大補湯補熱內熱陰血虛也四物加參朮作嘔欲嘔胃氣虛也六
君加炮薑食少體倦脾氣虛也補中益氣加茯苓半夏四肢逆冷小便頻數命門火衰也八味丸小便頻
數痰盛作渴腎水虧損也六味丸月經過期多日不止肝脾虛也八珍湯加柴胡丹皮凡潰而氣血虛弱
不斂者更用十全大補湯煎膏外補之入潰而寒邪凝滯不斂者用豆豉餅法散之其潰而內有膿管不
斂者用針頭散腐化之自愈若不補氣血不節飲食不慎起居不戒七情或用寒涼剋伐俱不治

治驗

一婦人左臂患之年許不潰堅硬不痛肉色不變脉弱少食月經過期日晡發熱勞役則痛遂與參苓歸
木川芎芍藥熟地貝母遠志香附桔梗丹皮甘草百餘貼而消

一婦人暴怒腰腫一塊胸膈不利時或氣走作痛與方脉流氣飲數劑而止更以小柴胡對四物加香附
貝母月餘而愈

一婦人因怒脇下腫痛胸膈不利脉沉滯以方脉流氣飲數劑少愈以小柴胡對二陳加青皮桔梗貝母

數劑頓退更以小柴胡湯對四物二十餘劑而痊

一婦人因閃胸肩患腫遍身痛遂以黑丸于二服而痛止以方脉流氣飲二劑而腫消更以二陳對四物加香附枳殼桔梗而全愈

一婦人腿患筋掣骨痛諸藥不應脉遲緊用大防風湯二劑頓退又二劑而安○又一婦患之亦然先用前湯二劑更服黑丸于而痊此二患若夫治潰成敗論

一婦人潰後發熱予以為虛彼不信乃服敗毒藥果發大熱竟至不救夫潰瘍雖有表證發熱宜以托裏為主佐以表散之劑何況癰癧流注乎若氣血充實經絡通暢決無患者此證之因皆由氣血素虧或七情所傷經絡鬱結或腠理不密六淫外侵隧道壅塞若不審其所因辨其虛實鮮不誤人

癰癧

婦人癰癧或因胎產血崩虧損腎肝或因憂思鬱怒傷損肝脾或因恚怒風熱肝胆血燥或因水涸血虛筋攣則累累然如貫珠故多生於耳前後項側胸脇間若寒熱腫痛乃肝經氣動而為病用柴胡梔子散以清肝火為主而佐以逍遙散以養肝血若寒熱既止而核不消乃肝經之血亦病用加味四物湯以養肝血為主而佐以柴胡梔子散以清肝火若初生如豆粒附着於筋肉色不變內熱口乾精神倦怠久不消潰乃肝脾虧損用逍遙散歸脾湯六味丸健脾土培肝木切不可輕用散堅追毒之劑外台秘要云肝腎虛熱則生癰矣病機云癰癧不係膏粱丹毒因虛勞氣鬱所致補形氣調經脈其瘡當自消散誤下之先犯病禁經甚若久潰脉浮大邪火盛也而色眇白金尅木也皆不治若赤脉貫腫于有幾條則幾年死

治驗

一婦人久而不愈或以為木旺之症用散腫消堅湯伐之腫硬益甚余以為肝經氣血虧損當滋化源用六味地黃丸補中益氣湯至春而愈此症若肝經風火暴病元氣無虧宜用前湯若風不旺而自病宜用瀉青丸虛者用地黃丸若水不能生木亦用此丸若金來剋木宜補脾土生腎水大凡風木之病但壯脾

土則木自不能剋矣。若行伐肝則脾胃先傷而木反來剋土矣。

一婦患之。恐不起。致少寐。年餘癰破膿水淋漓。經水或五十日。或兩月餘。一至誤服通經丸。展轉無寐。于前惡寒。午後發熱。余以為思慮虧損。脾血用歸脾湯。作丸。午前以六君子送下。午後以逍遙散送下。兩月餘得寐。半載後經行如期。年餘而瘡愈。

一癰婦潰後發熱。煩躁作渴。脈大而虛。以當歸補血湯六劑。而寒熱退。又以聖愈湯數劑。而全愈。更以八珍。加貝母。遠志三十餘劑而愈。

一婦人項結核寒熱。頭痛。腸乳脹痛。內熱口苦。小便頻數。症屬肝火血虛。用四物加柴胡。山梔。胆草而愈。又用加味逍遙散而安。

一婦人癰癰後遍身作痒。脈大按而虛。以十全大補加香附治之而愈。大凡潰後午前痒作氣虛。午後癢作血虛。若作風症治之必死。

一婦人項核腫痛。察其氣血俱實。先以必効散一服下之。更以益氣養榮湯補之。三十餘劑而消。常治此症。若必効出膿。但虛弱者先用前湯待其氣血稍充。乃用必効散去其毒。仍用補藥無不効。未成膿者灸肘尖。調經解鬱。又隔蒜灸多自消。有膿即針之。若氣血復而核不消。却服散堅之劑。月許不應。氣血不損。須用必効散其毒一下。即多服益氣養榮湯。如不應。亦灸肘尖。如瘡口不斂者。更用豆豉餅琥珀膏。若氣血俱虛或不慎飲食七情者不治。然此症以氣血為主。氣血壯實不用追蝕之劑。亦能自腐。但取去使易於收斂耳。血虛而用追蝕。不惟徒治。適足以敗矣。

乳癰乳巖

婦人乳癰屬胆胃二腑熱毒。氣血壅滯。故初起腫痛。發於肌表。肉色焮赤。其人表熱發熱。或發寒熱。或憎寒。頭痛煩渴引冷。用人參敗毒散。神効瓜蒌散。加味逍遙散治之。其自消散。若至數日之間。膿成清。穢稠膿湧出。膿盡自愈。若氣血虛弱。或誤用敗毒。久不收斂。膿清脈大。則難治。乳岩屬肝脾二臟鬱怒。氣血虧

損故初起小核結於乳內肉色如故其人內熱夜熱五心發熱肢體倦癯月經不調用加味歸脾湯加味逍遙散神効瓜萸散多自消散者佳每日月漸大紫巖色赤出水腐潰深洞用前歸脾湯等藥可延歲月若誤用攻伐危殆迫矣大凡乳症若因恚怒宜疎肝清熱熾痛寒熱宜發表散邪腫熾痛甚宜清肝消毒並隔蒜灸不作膿或膿不潰補氣血為主不收斂或膿稀補脾胃為主膿出反痛或發寒熱補氣血為主或脯熱內熱補血為主若飲食少慾或作嘔吐補胃為主飲食難化或作泄瀉補脾為主勞碌腫痛補氣血為主怒氣腫痛養肝血為主兒口所吹須吹通揉散成癰治以前法潮熱暮熱亦主前藥大抵男子多由房勞耗傷肝腎婦人鬱怒虧損肝脾治者審之世以孕婦患此名曰內吹然其所致因則一惟用藥不可犯其胎耳

治驗

一婦人內熱脇脹兩乳不時作痛口內不時辛辣若卧而起急則膈下牽痛此帶脉為患用小柴胡加青黃連二劑而瘥

一婦人因怒兩乳腫兼頭痛寒熱用人參敗毒散二劑表症已退用小柴胡加芎歸枳殼桔梗四劑而消

一婦人久鬱右乳內腫硬用八珍湯加遠志貝母柴胡青皮及隔蒜灸兼服神効瓜萸散兩月餘而消

一婦人左乳內腫如桃不痛不赤發熱漸瘳用八珍加香附遠志青皮柴胡百餘劑又兼服神効瓜萸散三十餘劑膿潰而愈

一婦人鬱久左乳內結核如杏許三月不消心脉澹而脾脉大按之無力以八珍加貝母遠志香附柴胡青皮桔梗五十餘劑而潰又三十餘劑而愈

一婦人稟實性躁懷抱久鬱左乳內結一核按之微痛以連翹飲子二十餘劑少退更以八珍加青皮香附桔梗貝母二十餘劑而消

一婦人發熱作渴至夜尤甚兩乳忽腫肝脉洪數乃熱入血室也用加味小柴胡湯熱止腫消

一婦人因怒左乳作痛發熱表散太過腫熱益甚用益氣養榮湯數劑熱止膿成不從用針腫脹熱渴針

膿大泄仍以前湯月餘始愈。此症若膿成未破有薄皮剝起者用代針之劑其膿自出不苦及時用針不致大潰若膿血未盡輒用生肌反助其損慎之。

一婦人因怒左乳作痛胸膈不利以方脉流氣飲加木香青皮四劑而安。

一婦人膿清腫硬面黃食少內熱痛熱自汗盜汗月經不行此肝脾氣血俱虛用十全大補加遠志貝母又補中益氣各三十餘劑外用代針患處諸症尋愈。

一婦人膿成脹痛余欲針之不從數日始針出敗膿三四碗許虛症蜂起幾至危殆用大補兩月餘而安若元氣虛弱不作膿者用益氣養榮湯補之膿成即針若腫痛寒熱怠惰食少或至夜熱甚用補中益氣湯兼逍遙散補之為善。

一產婦因乳少服藥通之致乳房腫脹發熱作渴以玉露散補之而愈夫乳汁乃氣血所化在上為乳在下為經若衝任之脉盛脾胃之氣壯則乳汁多而濃衰則淡而少所乳之子亦弱而多病又有偏產無乳或大便瀉滯乃亡津液也當滋化源。

一婦人右乳內結三核年餘不消朝寒暮熱飲食不甘此乳巖以益氣養榮湯百餘劑血氣漸復更以木香餅熨之喜其謹疾年餘而消。

至英內年二十有五素虛弱多鬱怒時疫後脾胃愈虛飲食愈少又值氣忿右乳脇下紅腫應內作痛用炒麩皮熨之腫雖少散內痛益甚轉側胸中如物懸墜遂與加減四物湯內腫如鵝卵外大如盤胸脇背心相引而痛夜熱勢甚時治者皆以攻毒為言叩諸先生乃云此病後脾弱而復怒傷肝治法惟主於健脾氣平肝火則腫自消而病自愈矣承惠方以八物加陳皮黃芪柴胡山梔白芷服八劑病減六七去白芷加青皮木香桔梗又六劑而全愈奏功之奇獲効之速蓋出於尋常萬萬也感激厚恩所夕不忘錄此乞附醫案以詔後之患者毋為攻毒者之所惑也晚生尤至英頓首再拜書。

一婦人乳內結核年餘膿熱少食余欲用益氣養榮湯治之彼以為緩乃服行氣之劑其勢愈甚潰而口

出清膿而破

郭氏妾乃放出宮女乳內結一核如粟亦服流氣等藥大如覆碗堅硬如石出水而死

血風瘡

婦人血風瘡因肝脾二經風熱鬱火血燥所致其外症身發疙瘡或如丹毒痒痛不常搔破成瘡膿水淋漓其內症月經無定小便不調夜熱內熱自汗盜汗惡寒憎寒肢體倦怠飲食不甘寒熱往來若發熱作痛乃肝經風熱血燥用當歸飲加柴胡山梔若體倦食少口乾潮熱乃肝脾鬱火傷血用加味逍遙散若疙瘡痛痒寒熱往來乃肝經風熱傷血用小柴胡加山梔黃連若夜間發熱作渴譫語乃熱入血室用小柴胡加生地黃血虛四物合小柴胡湯若無寐盜汗內熱晡熱乃脾經血虛用歸脾湯兼寒熱加山梔熟地若用風藥復傷陰血反致他症

治驗

一婦人素清苦四肢患此誤用敗毒寒涼晡熱內熱自汗盜汗月經不行口乾咽燥此鬱結傷脾四肢者脾主之用歸脾湯數劑後兼逍遙散五十餘劑而愈

一婦人性躁寒熱口苦脇痛耳鳴腹脹溺澀年餘矣症屬肝火用四君加柴胡炒山梔炒龍胆數劑乃與逍遙散兼服而瘡愈又與六味丸及逍遙散七十餘劑諸症悉退若有愈後身起白屑搔則肌膚如帛所隔此氣血虛不能營於腠理用大補之劑若有愈後發熱身起疙瘡痒痛搔破膿水淋漓經候不調此肝火血熱用四物加柴胡山梔白木茯苓丹皮甘草

一婦人日晡身痒月餘口乾又月餘成瘡服祛風之劑膿水淋漓干前畏寒午後發熱殊類風症余謂此肝經鬱火外邪所傳用補中益氣加山梔釣藤又以逍遙散加川芎貝母而愈

一婦人搔痒發熱日晡益甚膚見赤痕月經過期此血虛有熱以逍遙散倍加熟地熱止痒退更以四物加參芪柴胡炙甘草調理遂愈

一女子十二歲善怒遍身作痒用柴胡川芎山梔芍藥以清肝火以生地當歸黃芩涼肝血以白朮茯苓甘草健脾土而愈半載後遍身起赤痕或時眩暈此肝火熾甚血得熱而妄行是夜果經至

臃瘕

婦人兩臃生瘕或因胎產飲食失宜傷損脾胃或因憂思鬱怒虧損肝脾以致濕熱下注或外邪所侵外臃屬足三陽可治內臃屬足三陰難治若初起發腫赤痛屬濕毒所乘用人參敗毒或攢蘇敗毒散若漫腫作痛或不腫不痛屬脾虛濕熱下注用補中益氣或八珍湯若膿水淋漓體倦少食內熱口乾屬脾氣虛弱用補中益氣加茯苓酒炒芍藥若干後頭目不清屬陰火用前湯加酒炒黑黃柏若干後發熱體倦屬血虛用前湯加川芎熟地若懷抱不樂而甚用歸脾湯加山梔柴胡若悲怒氣逆而甚用補中益氣加川芎山梔若內熱體倦痰涎口瘡屬脾腎虛熱用六味丸若肢體畏寒飲食少思屬脾腎虛寒用八味丸大抵色赤屬熱毒易治色黯屬脾腎虛寒難治設誤用攻伐復傷胃氣難保其生

治驗

一婦人患之四畔微赤作痛重墜膿水淋漓胸膈不利飲食少思內熱口苦夜間少寐此屬脾虛鬱傷用歸脾湯解鬱結而生脾血用補中益氣加茯苓半夏補脾氣而除濕熱尋愈

一婦人久不愈色赤微熱日晡焮腫形體虛弱飲食少思勞則喘渴惡寒發熱此脾虛下陷用補中益氣湯而愈

一婦人三年矣色黯腫硬惡寒發熱飲食少思形體消瘦作渴飲湯飲食稍多或腹脹或泄瀉或作嘔或吞酸此脾氣虛寒用補中益氣加乾薑肉桂五十餘劑而愈

一婦人因入朝步履惡寒發熱倦怠懶食瘡口出血此勞傷元氣不能攝血歸經用補中益氣湯而愈

一婦人因怒寒熱頭眩或耳項胸脇脹痛或小腹陰道悶墜或小便頻數下血此屬肝火血熱先用小柴胡湯加炒黑山梔川芎當歸車前二劑諸症頓退又用加味道遙散補其陰血而愈後因飲食勞倦前症

復作瘡口出血用補中益氣湯治之而愈

一婦人患痢兩月。焮赤腫痛。小便頻數。飲食如常。用活命飲二劑。諸症悉愈。又用八珍湯而痊。

一婦人患此焮痛。惡寒發熱。用攢蘇散毒散而寒熱退。用仙方活命飲而焮痛止。再用補中益氣湯而形

氣健。

陰瘡 交接出血陰挺陰痒陰蟲附

婦人陰瘡。乃七情鬱火。傷損肝脾。濕熱下注。其外症有陰中舒出如蛇。俗呼陰挺。有翻突如餅。俗呼陰菌。亦有如雞冠花。亦有生諸蟲。亦有腫痛濕痒。潰爛出水。脹悶脫墜者。其內症口乾內熱。體倦。經候不調。飲食無味。脯熱發熱。胸膈不利。脇肋不調。小腹痞脹。赤白帶下。小水淋漓。其治法腫痛者。宜用四物加柴胡。山梔。丹皮。胆草。濕痒者。宜用歸脾。加山梔。丹皮。柴胡。淋瀝者。宜用龍膽瀉肝。加白朮。丹皮。潰腐者。宜用加味逍遙散。腫悶脫墜者。宜用補中益氣。加山梔。丹皮。佐以外治之法。備見治驗。

治驗

一婦人胸膈不利。內熱作渴。飲食不甘。肢體倦怠。陰中悶痒。小便赤澀。此鬱怒所致。用歸脾。加山梔。而愈。後因怒患處。并小腹痛。用小柴胡。加山梔。芍藥。芍藥而愈。但內熱。脯熱。用逍遙散。加山梔。而愈。後因勞役發熱。患處腫脹。小便仍澀。用補中益氣。加山梔。茯苓。丹皮。而愈。

一婦人陰中突出如菌。四圍腫痛。小便頻數。內熱。脯熱。似痒似痛。小腹重墜。此肝脾鬱結之症。益肝火。濕熱而腫痛。脾虛下陷而重墜也。先以補中益氣。加山梔。茯苓。車前。青皮。以清肝火。升脾氣。漸愈。更以歸脾。湯。加山梔。茯苓。芍藥。芍藥。調理。更以生豬脂和藜蘆末塗之。而收入。

一婦人陰中挺出一條五寸許。悶痛重墜。水出淋漓。小便澀滯。夕與龍胆瀉肝湯。分利濕熱。朝與補中益氣湯。升補脾氣。諸症漸愈。再與歸脾。加山梔。茯苓。芍藥。芍藥。間服調理。而愈。後因勞役。或怒氣。下部濕痒。小水不利。仍用前藥。即愈。亦有尺許者。亦有生諸蟲物者。皆用此治。

一婦人腐潰膿水淋漓腫痛寒熱小便赤澀內熱作渴肢體倦怠胸脇不利飲食少思三月餘矣用補中益氣內柴胡升麻各用一錢加茯苓一錢炒山梔二錢數劑少愈又與歸脾加山梔川芎茯苓三十餘劑諸症悉退惟內熱尚在再與逍遙散倍用山梔而愈

一婦人素性急陰中或痛小便赤澀怒則益甚或發熱或寒熱治以芍歸炒梔柴胡苓朮丹皮澤瀉炒芍炒車前炒連生草數劑漸愈乃去黃連澤瀉又數劑而全愈

一婦人素鬱悶陰內痛痒不時出水飲食少思肢體倦怠用歸脾加丹皮山梔芍藥柴胡生草主之而安
一婦人陰內痒痛灼熱倦怠飲食少思用參芪歸朮陳皮柴胡炒梔炒車前升麻芍藥丹皮茯苓治之而瘥若陰中有蟲痒痛亦屬肝木以桃仁研膏和雄黃末納陰中以殺之仍用清肝解鬱有以雞肝納之者乃取蟲之法也

一婦人交接違理出血作痛發熱口乾誤服寒涼之劑前症益甚不時欲嘔飲食少思此症屬肝經而藥復傷脾也先用六君子加柴胡而脾胃漸愈乃用加味道遙散而患處亦痊

一婦人每交接輒出血作痛數服皆涼血止痛之劑不時出血甚多此肝傷而不能藏血脾傷而不能攝血也用補中益氣濟生歸脾二湯而愈若交接出血用熟艾熱裹入陰中若交接違理而出血用亂髮青布燒為末敷之血自止若出血過多而見他症但用前藥調補肝脾諸症自愈矣

一婦人陰腫下墜悶痛出水胸腹不利小便頻數內熱脯熱口苦耳鳴先用小柴胡加車前胆草苓朮升麻二劑稍緩又用加味道遙加升麻數劑稍愈乃以加味歸脾加升麻柴胡并補中益氣加山梔數劑漸愈仍用加味道遙加味歸脾二藥調理而瘥

一婦人熱痛用寒涼敗毒飲食不入時欲嘔吐小腹重墜似欲去後此脾胃虧損元氣下陷症屬虛寒先用補中益氣加炮薑二劑重墜如失再用前湯加茯苓半夏二十餘劑而愈乃以歸脾少加柴胡升麻六味地黃丸調理兩月餘而瘥

附方并註

保和丸 治飲食停滯胸膈痞滿或作吞酸等症

山查 取肉二兩蒸 神麴 炒

半夏

茯苓 各一兩

蘿蔔子 炒

陳皮

連翹 各五錢

右為

末粥丸加白朮二兩名安丸

越鞠丸 治六鬱胸膈痞滿嘔吐吞酸或濕熱腹脹腿脚酸疼等症

蒼朮 炒

神麴 炒

香附

山查

山梔 炒

撫芎

麥芽 炒各分

右各

另為末水調炒麴麵糊為丸桐子大每服五七十九白滾湯下

左金丸 今名四 治肝火胸脇刺痛或發寒熱或頭目作痛小便淋秘或小腹疼痛一切肝火之症

黃連 六兩

吳茱萸 汁兩湯煮

右為末粥丸白朮陳皮湯下

椒仁丸 治先因經水斷絕後至四肢浮腫小便不通血化為水

椒仁

續隨子 研去皮

甘遂

附子 炮

郁李仁

黑牽牛

五靈脂 研

當歸

吳茱萸

延胡索 各五錢

芫花 醋浸一錢

石膏

虻青 十枚去頭翅足同糯

米炒黃去米不用

班狗 十箇糯米炒去米不用

膽礬

人言 各一錢

右為末麵糊為丸如豌豆大每服一丸橘皮湯下此方藥雖峻利所用不多若畏而不服有養病害身之患常治虛弱之人亦未見其有誤也

血分葶塵丸 治先因小便不利後至身面浮腫經水不通水化為血

葶塵 研炒

續隨子 去殼各半兩研

乾葶末 一兩

右為末棗肉丸如桐子大每服七丸煎匾竹湯下如大便利者減續隨子葶塵各一錢加白朮五錢

人參丸 治經脈不利化為水流走四肢悉皆腫滿名曰血分其候與水相類若作水治之非也宜用此

人參

大黃 濕紙裏飯上蒸去殼切炒

當歸

桂心

瞿麥穗

赤芍藥

白茯苓 略半

葶塵 炒另研

右為末煉蜜丸桐子大每服十五丸至二三十丸空心飲湯下

栢子仁丸 治血虛有火月經耗竭漸至不通日漸羸瘦而生潮熱慎毋以毒藥通之宜栢子仁丸澤蘭

湯主之

栢子仁炒 牛膝酒 卷栢各半 澤蘭葉 續斷各二 熟地黃用旺者三兩酒拌蒸 右

為末入地黃膏加煉蜜丸栢子大每服三十丸空心米飲下

澤蘭湯 治症同前

澤蘭葉三兩 當歸酒 芍藥炒各 甘草錢五 右為粗末每服五錢水二鍾煎至一鍾去渣溫服

獨參湯 治一切失血惡寒發熱作渴煩躁並宜此藥補氣蓋血生於氣陽生陰長之理也用人參二兩

棗十枚水煎服

王露散 治乳脉不行身體壯熱頭目昏痛大便澁滯等症

人參 白茯苓 桔梗炒 川芎 白芷 當歸 芍藥各一

甘草分五 右水煎服若熱甚大便秘量加炒大黃

聖愈湯 治血虛心煩睡臥不寧或五心煩熱

地黃酒拌蒸 生地黃酒 川芎 人參各五 當歸酒 黃芪炒各 右水煎服

當歸飲 治血熱癰瘡疼痛膿水淋漓發熱等症

當歸 白芍藥 川芎 生地黃 白茯苓各一 防風 荆芥各五

黃芪錢 何首烏 甘草分五 右水煎服

龍膽瀉肝湯 治肝經濕熱下部腫焮作痛小便澁滯陰挺如菌或出物如蟲等症

龍膽草酒拌 澤瀉各一 車前子炒 木通 生地黃酒 當歸尾酒 山梔炒

烏賊魚骨丸 治婦人血枯胸膈四肢滿妨於食飲病至聞腥臊臭氣先唾血出清液或前後泄血目眩

轉月事衰少不來

烏賊魚骨去甲四兩

魚煎湯下以飯壓之

閻如兩

右為末以雀卵和成劑丸如小豆大每服五丸加至十丸以鮑

青州白丸子

治風痰咳嗽或牙關緊急不知人事或痰滯作麻

南星三兩

半夏兩

白附子兩

川烏半兩各生用

右為末絹袋盛井水擺浸仍換水浸三五日

晒乾糯米粉丸如急用以薑汁糊丸亦可

四七湯

治七情鬱結咽間如有一核吞吐不利或中脘痞滿痰涎壅喘或惡心少食

紫蘇葉錢

厚朴五錢

茯苓錢

半夏姜製七錢

右薑棗水煎服若白帶以此湯送前丸其効如

神

當歸龍薈丸

治肝經症脇下作痛或有積塊或下疳便癰小便淋瀝或瘀血凝滯小腹作痛

當歸兩

龍膽草酒炒

梔子仁炒

茵陳

青皮

黃芩各一兩

大黃酒拌

蘆薈

青黛

柴胡各五錢

木香五錢

麝香另研

右為末炒神麴糊丸每服二三十丸姜湯下

阿魏膏 治一切瘡塊

羌活

獨活

玄參

官桂

赤芍藥

川山甲

生地黃

兩頭尖

大黃

白芷

天麻各五錢

紅花各

槐柳桃枝各三

木鱉子三十枚

去殼

亂髮如雞子大一塊

右用香油二斤四兩煎黑去粗入髮再煎化乃去粗徐下

黃丹煎乾硬得中方入芒硝阿魏蘇合油乳香沒藥五錢麝香三錢調勻成膏矣攤貼患處內服蘆薈

丸等黃丹須真正者効凡貼膏藥先用朴硝隨患處鋪半指厚以紙蓋用熱熨斗熨良久如硝耗再加

熨之熨二時許方貼膏藥若是肝積加蘆薈末同熨

蘆薈丸 治肝疝口舌生瘡牙眼腐爛或遍身生瘡等症

大皂甬 青黛 蘆薈研 硃砂研 麝香研各 乾蝦蟆用皂甬各五分燒存性

右為末蒸餅糊丸麻子大每服五七十丸米飲下

高方小續命湯 治歷節痛風痰厥口噤腰背反張等症

防己 肉桂去粗皮 杏仁炒去皮 黃芩 白芍 甘草 川芎

麻黃去根 人參一兩 薑各附子 附子炮去粗皮 防風五分 右為粗末每服三錢薑棗水煎服

調中益氣湯 治體怠嗜臥不思飲食或痰嗽泄瀉等症

黃芪分 人參去頭 蘆 甘草 蒼朮銘五 柴胡 橘皮 升麻

木香銘二 右薑棗水煎空心服

佛手散 治妊娠傷胎下血

當歸三 川芎如 右水煎食前服

木香餅 治一切氣滯結腫或痛或悶胸及風寒所傷作痛並効

木香五 生地苗兩 右木香為末地苗杵膏和勻量患處大小作餅置患處以熱熨斗熨之

隔蒜灸法 治一切瘡毒大痛或不痛或麻木如痛者灸至不痛不痛者灸至痛其毒隨火而散蓋火以

暢達拔引鬱毒此從治之法也有回生之功用大蒜頭去皮切三文錢厚安瘡頭上用艾裝於蒜上灸

之三壯換蒜復灸未成者即消已成者亦殺其大勢不能為害如瘡大用蒜搗爛攤患處將艾鋪上燒

之蒜敗再換如不痛或不作膿及不起發或陰瘡尤宜多灸灸而仍不痛不作膿不起發者不治此氣

血虛極也

神効葱熨法 治虛怯人肢體患腫塊或作痛或不痛或風襲於經絡肢體疼痛或四肢筋攣骨痛又治

流注跌撲傷損腫痛用葱頭細切杵爛炒熱敷患處冷易之再熨腫痛即止其効如神

豆豉餅 治瘡瘍腫硬不清及潰而不斂并一切頑瘡惡瘡用江西豆豉為末唾津和作餅子如錢大厚

如三文置患處以艾裝於餅上灸之乾則易之如背瘡用漱口水調作餅覆患處以艾鋪餅上灸之如未成者即消已成者能消其毒如有不効氣血虛敗也

益氣養榮湯 治抑鬱癱瘓或四肢患腫肉色不變或日晡發熱或潰而不斂

人參 茯苓 陳皮 貝母 香附 當歸 川芎

黃芪鹽水炒 熟地黃拌酒 芍藥炒各錢 甘草炙 桔梗炒各五分 白朮炒二錢 右薑水煎服

人參養榮湯 治潰瘍發熱惡寒四肢倦怠體瘦少食面黃短氣不能收斂若大瘡愈後多服之不變他病

白芍藥五錢 人參 陳皮 黃芪炙 桂心 當歸拌酒 白朮

甘草炙 熟地黃拌酒 五味子炒 茯苓各錢 遠志去心炒五分 右薑棗水煎服

方脉流氣飲子 治惱怒胸膈脹滿或肢體作痛或結壅腫血氣無虧者

紫蘇葉 青皮 苦梗 半夏煨 當歸 芍藥 烏藥

茯苓 川芎 黃芪 枳殼去穢炒 防風略半 甘草 橘皮各五分

大腹皮 木香各三 右薑棗水煎服

瀉青丸 治肝經鬱火實熱脇乳作痛大便秘結及肝經一切實火症

當歸 龍胆草 川芎 山梔 大黃 羌活 防風各等 右為末

蜜丸雞子大每服一二丸

人參敗毒散 治瘡瘍焮痛發寒熱或拘急頭痛等症

人參 羌活 獨活 前胡 柴胡 桔梗 枳殼

茯苓 川芎 甘草各一 右水煎服

生地黄丸 治師尼寡婦下寒乍熱肝脉弦長而出魚際

生地黄一兩酒 秦艽 黃芪 硬柴胡各五分 赤芍藥一兩 右為細末入地黃膏

加煉蜜少許丸桐子大每服三十丸烏梅煎湯下日進二服亦治室女患此

連翹飲子 治乳內結核

連翹 川芎 瓜蒌仁研 皂角刺炒 橘葉 青皮白 甘草節

桃仁路半 右水煎服

必効散 治瘰癧未成膿者自消已潰者自斂

南鵬砂五錢 輕粉錢 班猫四十箇講米同 熟去頭翅 麝香五分 巴豆五粒去膜 白檳榔一箇 右為細末

每服一錢五更用滾湯調下如小水滯滯或微痛此癰毒欲下也進益元散一服即下此方班猫巴

豆似為峻厲然用巴豆乃解班猫之毒用者勿畏

琥珀膏 治頸項癭癧及腋下初如梅子腫結硬強漸如連珠不消不潰或潰而膿水不絕經久不瘥漸成漏症

琥珀兩 木通 桂心 當歸 白芷 防風 松脂

硃砂研 木鱉子兩各錢 麻油斤 丁香 木香錢三 右先用琥珀丁香桂心硃砂木香

為細末其餘藥入油內煎焦黑濾去粗徐徐入黃丹再煎軟硬得中即成膏矣

神効瓜蒌散 治乳癰初起腫痛及一切癰疽或膿出後餘毒亦宜用之

黃瓜蒌子多者一箇 當歸兩 生甘草兩 沒藥一錢 乳香錢 右酒水煎服

餘方見下卷

女科撮要下卷

吳郡薛 己著

新都閔道政校

保胎

妊娠若元氣不實發熱倦急或胎動不安用當歸散因氣惱加枳殼胸膈痞悶再加蘇梗或作痛加柴胡若飲食不甘或欲嘔吐用六君加紫蘇枳殼若惡阻嘔逆頭暈體倦用參橘散未應用六君子湯若惡阻嘔吐不食煩悶亦用參橘散之類若顛仆胎動腹痛下血用膠艾湯未應用八珍加膠艾若顛仆毒藥腰痛短氣用阿膠散未應前送知母丸若顛仆胎傷下血腹痛用佛手散未應用八珍送知母丸若心驚胆怯煩悶不安名子煩用竹葉湯未應血虛佐以四物氣虛佐以四君若下血不止名胎漏血虛用二黃散血去多用八珍加膠艾若不特作痛若小腹重墜名胎痛用地黃當歸湯未應加參朮陳皮或因脾氣虛用四君加歸地中氣虛用補中益氣湯若面目虛浮肢體如水氣名子腫用全生白朮散未應用六君子湯下部腫甚用補中益氣倍加茯苓或因飲食失宜嘔吐泄瀉此是脾胃虧損用六君子湯若足指發腫漸至腿膝喘悶不安或足指縫出水名水氣用天仙藤散脾胃虛弱兼以四君子未應用補中益氣兼以道遠散若胎氣上攻心腹脹滿作痛名子懸用柴蘇飲飲食不甘兼四君子內熱稍熱兼道遠散若小便澇少或成淋瀝名子淋用安榮散不應兼八珍湯腿足轉筋而小便不利急用八味丸緩則不救若項強筋攣語瀆痰盛名子癰用羚羊角散或飲食停滯腹脹嘔吐此是脾胃虛弱而不能消化用六君子湯不應用平胃散加參苓或胎作脹或腹作痛此是脾胃氣虛而不能承載用安胎飲加升麻白朮不應用補中益氣湯或臍腹作脹或小便淋閉此是脾胃氣虛胎壓氣泡四物加二陳參朮空心服後探吐藥出氣不定又服又吐數次必安或因勞役所傷或食煎炒小便帶血此是血得熱而流于腑中宜清膀胱用道遠散或遺尿不禁或高頻數此是肝火血熱用加味道遠散若胸滿腹脹小便不通遍身浮腫名胎水不利

用鯉魚湯脾胃虛佐以四君子。病名同而形症異。形症異而病名同。聊見本方。凡用見症之藥不應當分月經治之。

治驗

一妊娠三月。其經若來三五次。但不多。飲食精神如故。此血盛有餘。光大能飲。自不來矣。果然。

一妊娠六月。每怒氣便見血。甚至寒熱頭痛。腸脹腹痛。作嘔少食。余謂寒熱頭痛。肝火上衝也。腸脹腹痛。肝氣不行也。作嘔少食。肝侮脾胃也。小便見血。肝火血熱也。用小柴胡加芍藥炒黑山梔。茯苓白朮而愈。

一妊娠六月。體倦食少。勞役見血。用六君加當歸熟地升麻柴胡而愈。

一妊娠每三四月胎便作痛。余用當歸地黃湯治之不日而愈。

一妊娠三月。飲食後因怒患瘧。連吐三次。用藿香正氣散二劑。隨用安胎飲一劑而愈。後因怒痰甚狂言發熱胸脹。手按少得。此肝脾氣滯。用加味道遙散加川芎。二劑頓退。四劑而安。

一婦人每怒發熱胸脹。小便淋瀝。每月經行旬餘未已。受胎三月。因怒前症復作。朝用加味道遙散。夕用安胎飲。各二劑而安。五月又怒復作。下血如經行。四日未止。仍用前藥而愈。

一妊娠將三月。嘔吐惡食。體倦嗜臥。此惡阻之症。用人參橘皮湯。二劑漸愈。又用六君加紫蘇。二劑而安。一妊娠吞酸惡心。欲作嘔吐。此飲食停滯。用六君加麩炒黑豆。芍藥香附。治之而愈。

一妊娠飲食後惱怒。寒熱嘔吐。頭痛惡寒。胸腹脹痛。大便不實而色青。小便頻數。而有血。余曰。當清肝健脾為主。不信。乃主安胎止血。益甚。問余曰。何也。余曰。大便不實。而或青。此是飲食既傷脾土。而兼木侮。小便頻數。而有血。此是肝火血流於胞。而兼挺痿也。用六君子加枳殼紫蘇山梔。二劑脾胃頓醒。又用加味道遙散。加紫蘇枳殼。二劑小便頓清。更節飲食。調理而安。

一妊娠每至五月。肢體倦怠。飲食無味。先兩足腫。漸至遍身。後及頭面。此是脾肺氣虛。朝用補中益氣。夕用六君子。加蘇便而愈。凡治妊娠。毋泥其月數。但見某經症。便用某藥。為善。

一妊娠因怒吐血塊四日不止兩脇脹痛小便淋瀝此怒而血蓄於上部火炎而隨出也脇脹腹痛小便淋瀝肝經本病也用小柴胡合四物四劑而止却用六君子安胎飲調理而安

一妊娠氣喘深甚諸藥不應問治於余詢之云素有帶下始於目下浮兩月餘其面亦然此氣虛有痰飲也用六味丸料數劑而愈

凡婦人氣血方盛乳房作脹或無兒飲痛脹寒熱用芩芽二三兩炒熟水煎服立消其耗散血氣如此何脾胃虛弱飲食不消方中多用之一云芩芽最消腎若氣血虛而乳汁自出者宜十全大補湯其子多不育

小產

小產重於大產蓋大產如粟熟自脫小產如生採破其皮殼斷自根蒂豈不重於大產但人輕忽致死者多矣治法宜補形氣生新血去瘀血若未足月痛而欲產芎歸補中湯倍加知母止之若產而血不止人參黃芪湯補之若產而心腹痛當歸川芎湯主之胎氣弱而小產者八珍湯圍之若出血過多而發熱聖愈湯汗不止急用獨參湯發熱煩躁時觸筋惕八珍湯大渴面赤脉洪而虛當歸補血湯身熱面赤脉沉而微四君薑附東垣云晝發熱而夜安靜是陽氣自旺於陽分也晝安靜而夜發熱躁是陽氣下陷於陰中也如晝夜俱發熱者是重陽無陰也當峻補其陰王大僕云如大寒而甚熱之不熱是無火也熱來復去晝見夜伏夜發晝止時節而動是無火也如大熱而甚寒之不寒是無水也熱動復止倏忽往來時動時止是無水也若陽氣自旺者補中益氣湯陽氣陷於陰者四物二連湯重陽無陰者四物湯無火者八味丸無水者六味丸

治驗

一妊娠五月服剪紅丸而隨腹中脹痛服破血之劑益甚以手按之益痛余曰此峻藥重傷脾胃受惠用八珍倍人參黃芪半夏乳香沒藥二劑而痛止數劑而全愈

吳江序女史萬湖仲子室年二十餘疫疾墮胎時咳服清肺解表喘急不寐請治余以為脾土虛不能生

肺金藥損益甚。先與補中益氣。加茯苓半夏五味炮薑。四劑漸愈。注視之。又與八珍加五味及十全大補湯全愈。

大兒婦張氏素怯弱。嘉靖癸卯四月生女。自乳中患疥癩。年餘不愈。遂致羸困。甲辰五月。遭先母大故。以姑病勉強代執喪禮。旬月。每欲眩仆。一日感氣。忍患心脾。高腫作疼。手不可按。而嘔吐不止。六脉微細之極。余以為脉雖虛而病形則實。誤認諸痛不可補氣。乃用青皮香附吳茱萸等藥而愈。繼復患瘧且墮胎。又投理氣行血之藥。病去元氣轉脫。再投參芪補劑不應矣。六脉如絲欲絕。思非附子不能救。非立翁莫能投。迎翁至診云。皆理氣之劑。損真之誤也。連投參芪歸朮附子薑桂六劑。間用八味丸。五日眠食漸甘。六脉全復。翁云。心脾疼痛時。即當服此等藥。瘧亦不作矣。姑婦皆翁再造。敢述奇功。附於此門之尾。以為初知藥性者之戒。制生陳遜稽顙謹識。

保產

妊娠欲產之時。但覺腹內轉動。即當正身仰臥。待兒轉身。向下時作痛。試捏產母手中指中節。或本節跳動。方與臨盆。即產矣。若初覺不仰臥。以待轉胞。或未產而水頻下。此胞衣已破。血水先乾。必有逆生難產之患。若橫生者。兒先露手臂。令母正臥。以手徐推兒臂下體。令其正直。復以中指摩其肩。勿令臍帶攀係。即生逆生者。兒先露足。令母正臥。以手按推其足。仍推兒轉正。即生偏生者。兒頭偏在一邊。亦照前法。徐正其頭。即生。或見頭後骨。偏在谷道傍。徐推近上。即生。礙產者。兒頭雖正。但不能下。蓋因胎轉臍帶攀肩所致。用中指按兒兩肩。理脫臍帶。即生。坐產者。兒將欲生。其母疲倦。久坐椅褥。按其生路。急用巾帶高懸。令母以手攀之。輕輕屈足良久。兒順即生。盤腸生者。臨產母腸先出。此難於收。上以草麻子四十九粒。研爛塗產母頭頂。待腸收。上急洗去。設或為風吹乾。不能收者。以磨刀水少許。溫熱拭潤其腸。再用磁石煎湯服之。即收。上磁石須陰陽家用。有驗者。俗以水噴母面。皆驚而腸亦收之。蓋驚則氣散。恐反致他症。戒之。若胎衣破而不得分娩者。用保生無憂散。以固其血。自然生息。如血已耗竭。用八珍湯料一斤。益母草

半斤水數碗煎熟不時飲之亦有得生者凡孕婦口腹痛未產也若連接痛甚者將產也蓋腎候於腰胞係於腎故也華陀治橫逆產難用蛇脫二條蟬殼二十八箇胎髮二九各燒灰每服二錢酒調連進二服即卧片時兒即順生如無此藥令產母仰面正卧以小針刺兒手腳心三五次用鹽塗之手腳即縮上待身轉順即生○若以蜀葵子四十九粒白滑石三錢順流水煎服即順生或用好京墨濃磨服之墨水裹兒即下○或敗筆頭一箇煨過以藕節自然汁溫酒和下○或紫蘇葉當歸各三錢長流水煎服即下○凡孕家宜預請穩婆有仁心識見者當施恩惠以結其心先與說知倘有生息不順只說未產或遇双胎只說胎衣未下恐驚則氣散愈難生息余家親驗之大抵難產多患於鬱悶安佚富貴之家治法雖云胎前消氣產後補血不可專執若脾胃不實氣血不充宜預調補不然臨產必有患難○如因難產或大寒時急以大油紙摺徐徐燒斷其臍帶雖兒已死令煖氣入腹多得復生切不用刀斷之

治驗

荆婦孟冬分娩艱難產子已死元氣勞傷用油紙摺燒斷臍帶取其腸氣以補之依間兒啼作聲即鵠兒也若以刀物如常斷之其母亦難保生此兒嗣後一二歲間並無傷食作瀉之症可見前法之功其穩婆又喜平日常施少惠得其用心能安慰母懷故無虞耳○此穩婆云止有一女分娩時適當巡街侍御行牌取我視其室分娩女為此驚嚇未產而死後見侍御更以威顏分付迨視產母胎雖順而頭偏在一邊若以手入推正可保順生因畏其威不敢施手但回稟云此是天生天化非人力所能立俟其母子俱死

于死腹中

夫于死腹中者多因驚動太早或觸犯禁或抱腰太重或頻探試水胞衣先破血水先盡而胎乾涸故耳其候產母唇舌皆黑者于母俱死若舌黑或脹悶甚者然其子已死矣先以平胃散一兩酒水各半煎却投朴硝半兩即熟皮硝服或用硝一兩以童便調下亦妙

治驗

一穩婆之女勤苦員重。妊娠腹中陰冷重墜。口中甚穢。余意其胎必死。令視其舌果青黑。與朴硝半兩許。服之。隨下穢水而安。

一婦人胎死。服朴硝而下穢水。肢體倦怠。氣息淹淹。用四君為主。佐以四物薑桂調補而愈。

胎衣不出

有因惡露入衣脹而不能出。有因元氣虧損而不能送出。其惡露流衣中者。腹中脹痛。用奪命丹。或失笑散。以消瘀血。緩則不救。其元氣不能送者。腹中不脹痛。用保生無憂散。以補固元氣。或用單葶子肉一兩。細研成膏。塗母右脚心。衣下即洗去。緩則腸亦出。如腸不上。仍用此膏塗腦頂。則腸自入。益母丸亦効。寶慶方。胎衣未下。若欲斷臍帶。先以少物擊墜。然後斷之。否則胞上掩心而死。

治驗

家人婦胞衣不出。胸腹脹痛。手不敢近。此瘀血為患。用熱酒下。夫笑散一劑。惡露胎衣即並下。

一產婦胎衣不出。腹不脹痛。手按之痛稍緩。此是氣虛而不能送出。用無憂散而下。前症余詢諸穩婆云。宜服益母草丸。或就以產婦頭髮入口作嘔。胎衣自出。其不出者必死。授與前法甚効。

交骨不開陰門不開子宮不收

三者皆元氣不足。觀諸治驗。可見其交骨不開者。用芍歸湯。加髮灰龜板補而開之。陰門不開者。用十全大補。加五味子補而飲之。子宮不收者。補中益氣。加醋炒芍藥半夏。補而舉之。或助以外治之法。

治驗

地官李孟卿。娶三十五歲。稚女為繼室。妊娠慮其難產。與加味芍歸湯。四劑備用。果產門不開。服之頓然分娩。

西賓費懷德之室。下血甚多。產門不開。兩日未生。服前藥一劑。即時而產。已後育胎。並無此症。懷德傳與服者。無有不効。

一婦人分娩最易。至四十妊娠。下血甚多。產門不開。亦與前湯一劑。又用無憂散斤許。一劑煎熟。時時飲之。以助其血而產。

一產婦陰門不開。發熱惡寒。用十全大補。加五味子數劑。而寒熱悉退。又用補中益氣。加五味子數劑。而飲若初產。腫脹或焮痛。而不閉者。當用加味逍遙散。若腫既消。而不閉者。當用補中益氣湯。切忌寒涼之劑。一婦人脾胃素弱。兼有肝火。產後陰門腫痛。寒熱作渴。嘔吐不食。數大黃等藥。服驅利之劑。腫及於臂。虛症蜂起。此真氣虛而作。先用六君子以固脾胃。乃以補中益氣湯升舉。不數劑而消。

一產婦失治。腫潰不已。形體消瘦。飲食不進。朝寒暮熱。自汗盜汗。半年矣。用補中益氣。加茯苓半夏。以健脾胃。膿水漸少。飲食漸進。用歸脾湯。以解脾鬱。共五十餘劑。元氣復而瘡亦愈矣。

一產婦陰門不開。小便淋瀝。腹內一物。攻動脇下。或脹或痛。用加味逍遙散。加車前子而愈。一婦人子宮腫大。二日方入。損落一片。殊類猪肝。已而面黃體倦。飲食無味。內熱。晡熱。自汗盜汗。用十全大補湯。二十餘劑。諸症悉愈。仍復生育。血滯成癰。方見後。

產後腹痛

產後小腹作痛。俗名兜枕塊。用失笑散行散之。若惡露既去。而仍痛。用四神散調補之。若不應用八珍湯。若痛而惡心。或欲作嘔。用六君子湯。若痛而泄瀉。用六君子湯。送四神丸。若泄瀉痛。而或後重。用補中益氣湯。送四神丸。若胸膈飽脹。或惡食吞酸。或腹痛。手不可按。此是飲食所致。當用二陳。加山查白朮。以消導。若食既消。而仍痛。或按之。不痛。或更加頭痛。煩熱作渴。惡寒欲嘔等症。此是中氣被傷。宜補脾胃為主。若發熱腹痛。按之痛甚。不惡食。不吞酸。此是瘀血停滯。用失笑散以消之。若止是發熱頭痛。或兼腹痛。按之却不痛。此是血虛。用四物。加炮薑。參朮。以補之。病機要云。胎產之病。從厥陰經論之。無犯胃氣。及上二焦。為之三禁。不可汗。不可下。不可利。小便發汗者。同傷寒下早之症。利大便。則脈數而已。動於脾。利小便。則內亡津液。胃中枯燥。製藥之法。能不犯三禁。則榮衛自和。而寒熱止矣。如發渴。用白虎。氣弱。用黃芪。血

刺痛則用當歸腹中痛則加芍藥宜詳察脉症而用之丹溪先生云產後當大補氣血為先雖有雜症從末治之一切病多是血虛皆不可發表

治驗

一產婦腹痛發熱氣口脉大余以為飲食停滯不信乃破血補虛反寒熱頭痛嘔吐涎沫又用降火化痰理氣四肢逆冷泄瀉下墜始信謂余曰何也余曰此脾胃虛之變症也法當溫補遂用六君加炮薑二錢肉桂木香一錢四劑諸症悉退再用補中益氣之劑元氣悉復

一婦人產後腹痛後重去痢無度形體倦怠飲食不甘懷抱久鬱患爾唇寐而盜汗如雨竟夜不敢寐神思消爍余曰氣血虛而有熱用當歸大黃湯內黃芩連栢炒黑一劑汗頓止再劑全止乃用歸脾湯八珍散兼服元氣漸服而愈

一產婦小腹作痛服行氣破血之藥不效其脉洪數此瘀血內潰為膿也以瓜子仁湯二劑痛止更以太乙膏下膿而愈產後多有此病縱非癰患用之更效

一產婦小腹疼痛小便不利用薏苡仁湯二劑痛止更以四物加桃仁紅花下瘀血而愈大抵此症皆因榮衛不調或瘀血停滯所致若脉洪數已有洪脉但數微有膿脉遲緊乃瘀血下之即愈若腹脹大轉側作水聲或膿從臍出或從大便出宜用蠟礬丸太乙膏及托裡藥

一產婦小腹作痛有塊脉孔而瀉以四物加玄胡索紅花桃仁牛膝木香治之而愈

一婦人產後小腹疼痛服瓜子仁湯下瘀血而痊凡瘀血停滯宜急治之緩則腐化為膿最難治療若流注關節則患骨痠失治多為敗症

一婦人因經水多加瀉藥止之致腹作痛以失笑散二服而瘳

產後血暈并失血

產後元氣虧損惡露乘虛上攻眼花頭暈或心下滿悶神昏口噤或痰壅厥者急用失笑散主之若血下

多而暈或神昏煩亂者大劑芍歸湯補之或芸蓼散或童子小便有痰加二陳湯若因勞心力而致者宜補中益氣加香附若因氣血虛極不省人事用清魂散繼以芍歸湯又大補氣血之劑凡產可預燒鉄錠令赤以器盛之急至床前以醋沃之或以醋塗口鼻聞之即醒或用破舊漆器或乾漆燒烟薰之或用半夏末冷水和丸入鼻孔中並無前患丹溪先生云血暈因氣血俱虛痰火泛上宜以二陳導痰或加減硃砂安神丸以麥門冬湯下亦可大凡產後口眼喎斜等症當大補氣血為主而兼以治痰若脾胃虛而不能固者用六君子湯至五七箇月宜服安胎飲至八九箇月再加大腹皮首楊腦如臨產時更宜服保生無憂散庶無前患

治驗

一產婦月餘矣因怒兩脇脹痛忽吐血甚多發熱惡寒胸腹脹滿用八珍加柴胡丹皮炮薑而安却用十全大補仍加炮薑而愈前症因脾肺氣血虧損而胸腹虛痞雖投大補若非薑桂辛溫助其脾肺以行藥勢亦無以施其功而反助其脹耳

家人婦產後小腹作痛忍牙關緊急進以失笑散良久而甦又用四物加炮薑白朮陳皮而愈

一產婦筋掣臂軟肌肉掣動此氣血俱虛用十全大補湯而愈

一產婦兩手麻木服愈風丹天麻丸遍身皆麻神思倦怠脯熱作渴自汗盜汗此氣血俱虛也用十全大補加炮薑數劑諸症悉退却去炮薑又數劑而愈但內熱此血虛也用逍遙散而痊

產後發痊 瘧當作瘧

產後發痊因去血過多元氣虧極或外邪相搏其形牙關緊急四肢勁強或腰背反張肢體抽搐若有汗而不惡寒者曰柔痊若無汗而惡寒者曰剛痊然產後患之實由亡血過多筋無所養而致故傷寒汗下過多清瀉膿血大泄多患之乃敗症也若大補血氣多保無虞若攻風邪死無疑矣

治驗

一產婦牙關緊急腰背反張四肢抽搐兩目連劄余以為去血過多元氣虧損陰火熾盛用十全大補加炮薑一劑而甦又數劑而安

余在吳江史萬湖第將入更時聞喧嚷云某家人婦忍仆牙關緊急已死矣詢云是新產婦出直厨余意其勞傷血氣而發瘧也急用十全大補加附子煎滾令人推正其身一人以手夾正其面却窅開其口將藥灌之不嚙藥已冷令側其面出之仍正其面復灌以熱藥又冷又嚙如此五次方嚙下隨灌以熟藥遂甦

產後便血

產後便血或飲食起居或六淫七情以致元氣虧損陽絡外傷治法若因膏粱積熱用加味清胃散若因醇酒濕毒葛花解醒湯若因怒動肝火六君加柴芍芍歸若因鬱結傷脾加味歸脾湯若因思慮傷心炒香散若因大腸風熱四物加側柏荆防枳殼槐花若因大腸血熱四物加苓連若因腸胃虛弱六君加升麻柴胡若因腸胃虛寒六君加肉蔻木香若因元氣下陷補中益氣加茯苓半夏若因氣虛用六君升麻若因血虛用四物氣血俱虛用八珍俱加柴胡升麻大凡病久或元氣虛弱見病百端皆因脾胃虧損內真寒而外假熱但用六君子或補中益氣加炮薑溫補脾氣諸症悉退若四肢畏冷屬陽氣虛寒急加附子病因多端當臨症制宜庶無誤矣

治驗

一產婦產後下血諸藥不應飲食少思肢體倦怠此中氣虛弱用補中益氣加羌炒黃連五分四劑頓止但怔忡少寐盜汗未止用歸脾湯治之而痊

一婦人但怒便血寒熱口苦或胸脇脹痛或小腹痞悶此木乘土用六君加山梔柴胡而愈用補中益氣加味逍遙二藥而不復作

一婦人久下血在壘前屬脾胃虛寒元氣下陷用補中益氣加連炒吳茱一錢數劑稍緩乃加生吳茱五分數劑而愈

一婦人產後使血口乾飲湯胸脇膨滿小腹悶墜內熱脯熱飲食不甘體憊面黃日脯則赤洒淅惡寒此脾肺氣虛先用六君加炮薑木香諸症漸愈用補中益氣將愈用歸脾湯全愈後飲食失節勞役兼怒氣發熱血崩夜間熱甚謔語不絕此熱入血室用加味小柴胡二劑而熱退用補中益氣而血止用逍遙散歸脾湯調理而康

產後大便不通

產後大便不通因去血過多腸乾澀或血虛火燥乾澀不可計其日期飲食數多用藥通之潤之必待腹滿覺脹目欲去而不能者乃結在直腸宜用猪胆汁潤之若服苦參藥潤通反傷中焦元氣或愈加難通或通而瀉不能止必成敗症若屬血虛火燥用加味逍遙散氣血俱虛八珍湯慎不可用麻子杏仁枳殼之類

治驗

一產婦大便不通七日矣飲食如常腹中如故余曰飲食所入雖倍常數腹不滿脹用八珍加桃杏二仁至二十一日腹滿欲去用猪膽汁潤之先去乾薑五七塊後皆常糞而安

一產婦大便八日不通用通利之藥中脘作痛飲食甚少或云通則不痛痛則不通乃用蜜導之大便不禁吃逆不食余曰此脾腎復傷用六君加吳茱肉果骨脂五味數劑喜其年壯不然多致不起

產後寒熱

產後寒熱因氣血虛弱或脾胃虧損乃不足之症經云陰虛則發熱陽虛則惡寒若兼大便不通尤屬氣血虛弱切不可用發表降火若寸口脈微名陽氣不足陰氣上入於陽中則惡寒用補中益氣湯尺部脈弱名陰氣不足陽氣下陷於陰中則發熱用六味地黃丸大抵陰不足陽往從之則陽內陷而發熱陽不足陰往從之則陰上入而惡寒此陰陽不歸其分以致寒熱交爭故惡寒而發熱也當用八珍湯若病後四肢發熱或形氣倦怠此元氣未復濕熱乘之故耳宜補中益氣湯若肌熱大渴引飲目赤面紅此血虛

發熱用當歸補血湯若認為寒則誤矣

治驗

一產婦惡寒發熱用十全大補加炮薑治之而愈但飲食不甘肢體倦怠用補中益氣而安又飲食後犯怒惡寒發熱抽搐咬牙難候其脈視其面色青中隱黃欲按其腹以手護之此肝木侮脾土飲食停滯而作用六君加木香一劑而安

一產婦惡寒發熱余欲用八珍加炮薑治之其家知醫以為風寒用小柴胡湯余曰寒熱不時乃氣血虛不信仍服一劑汗出不止譚語不絕煩熱作渴肢體抽搐余用十全大補二劑益甚脈洪大重按如無仍以前湯加附子四劑稍緩數劑而安

產後咳嗽

產後咳嗽或因陰血耗損或因肺氣虧傷或陰火上炎或風寒所感主治之法若陰血虛者用芍歸熟地參朮肺氣傷者用四君芍歸桔梗陰火上炎者六味地黃加參朮風寒所感者補中益氣加桔梗紫蘇若瘀血入肺發喘急用二味參蘇飲多有得生者若兼口鼻起黑或鼻出血急用前散亦有得生者然而所患悉因胃氣不足蓋胃為五臟之根本人身之根蒂胃氣一虛五臟失所百病生焉但患者多謂腠理不密所致殊不知肺屬辛金生於己土亦因土虛不能生金而腠理不密外邪所感只陰火上炎亦壯土金生腎水以制火為善若遲治其病則誤矣

治驗

一產婦咳嗽聲重鼻塞流涕此風寒所感用參蘇飲一鍾頓愈六七乃與補中益氣加桔梗茯苓半夏一劑而痊又與六君加黃芪以實其腠理而安

一產婦朝吐痰夜發熱兼之無寐况用清痰降火肌體日瘦飲食日少前症愈甚余曰早間吐痰脾氣虛也夜間發熱肝血虛也晝夜無寐脾血耗也遂用六君子湯加味道遙散加味歸脾湯以次調補不月而痊

一產婦咳嗽痰盛面赤口乾內熱肺熱徹作無時此陰火上炎當補脾胃遂用補中益氣湯六味地黃丸而愈

一產婦咳而腹滿不食涕唾面腫氣逆此病在胃關於肺用異功散而愈

產後瘧疾

產後瘧疾因脾胃虛弱飲食停滯或因外邪所感或鬱怒傷脾或暑邪所伏審係飲食用六君加桔梗蒼朮藿香如外邪多而飲食少用藿香正氣散如外邪少而飲食多用人參養胃湯飲食勞役用補中益氣湯氣血虛弱用十全大補加炮薑虛寒用六君加姜桂元氣脫陷急加附子大凡久瘧多屬元氣虛寒益氣虛則寒血虛則熱胃虛則惡寒陰火下流則寒熱交作或吐瀉不食腹痛煩渴發熱譫語或手足逆冷寒戰如慄雖見百症當峻溫補其病自退若誤用清脾截瘧之類多致不起

治驗

一產婦患瘧發熱作渴胸膈脹滿遍身作痛三日不食嘔酸噯氣此是飲食所傷脾胃不能消化用六君加神麩山查四劑而不作酸乃去神麩山查又數劑而飲食進其大便不通至三十五日計進飲食七十餘碗腹始悶令用猪胆汁導而通之其糞且不甚燥

一產婦患瘧久不愈百病蜂起其脉或洪大或微細或弦緊或沉伏難以名狀用六君加炮薑二十餘劑脉症稍得又用參朮煎膏佐以歸脾湯百餘劑而瘧

一產婦朝寒暮熱或不時寒熱久不愈用六君子補中益氣兼服百餘劑而尋愈

產後瘧疾心脾痛見小產

產後瀉痢二症治同兼嘔吐

產後瀉痢或因飲食傷損脾土或脾土虛不能消食當審而治之若米食所傷用六君加穀蘖若麩食所

傷用六君加麥蘖。若肉食所傷用六君加山查神麩。凡兼嘔吐皆加藿香。若兼噯酸或嘔吐用前藥送越鞠丸。若肝木來侮脾土用六君加柴胡炮薑。若寒水反來侮土用錢氏益黃散。若久瀉或元氣下陷兼補中益氣湯。以升發陽氣。若瀉痢色黃乃脾土真氣宜加木香肉果。若屬脾土虛寒當用六君加木香姜桂。若脾腎虛寒用補中益氣及四神丸。若屬命門火衰而脾土虛寒用八味丸以補土母。若小便瀉滯肢體漸腫或兼喘咳用金匱腎氣丸以補脾腎利水道。若胃氣虛弱而四肢浮腫治瀉補胃為主。若久而不愈或非飲食所傷而致乃屬腎氣虧損蓋胞胎主於任而係於腎。況九月十月乃腎與膀胱所養必用四神六味八味三藥以補腎。若用分利導水之劑是虛其虛也。

治驗

一產婦瀉痢發熱作渴吐痰甚多肌體消瘦飲食少思或胸膈痞滿或小腹脹墜年餘矣。余以為脾胃瀉朝用二神丸夕用六君子湯三月餘而痊。

一婦人產後泄瀉兼嘔吐噯酸面目浮腫此脾氣虛寒先用六君加炮薑為主佐以越趨丸而噯酸愈。又用補中益氣加茯苓半夏而脾胃康。

一產婦瀉痢年餘形體骨立內熱肺熱自汗盜汗口舌糜爛日吐痰三碗許脉洪大重按全無此命門火衰脾土虛寒而假熱然痰者乃脾虛不能統攝歸源也用八味丸補火以生土用補中益氣湯兼補肺金而脾胃健。

一產婦腹痛後重去痢無度形體倦怠飲食不進與死為鄰此脾腎俱虛用四神丸十全大補湯而愈。但飲食難化肢體倦怠用補益湯調理而康。

一婦人五月患痢日夜無度小腹墜痛發熱惡寒用六君子湯送香蓮丸二服漸愈仍以前湯送四神丸四服全愈。至七月終怠惰嗜臥四肢不收體重節痛口舌乾燥飲食無味大便不實小便頻數洒淅惡寒悽慘不樂此肺之脾胃虛而陽氣寒不伸也用升陽益胃湯而痊。

附方并註

加味道遙散 治血虛有熱遍身瘙癢或口燥咽乾發熱盜汗食少嗜臥小便澀滯等症

甘草炙 當歸炒 芍藥酒 茯苓 白朮炒 柴胡路一 牡丹皮

山梔炒各五分 右水煎服

道遙散即前方去丹皮山梔

歸脾湯 治脾經失血少寐發熱盜汗或思慮傷脾不能攝血妄行或健忘怔忡驚悸不寐或心脾傷痛

急情嗜臥飲食不思

人參 白朮 黃芪炒 當歸 龍眼肉 遠志

酸棗仁炒 路木香瓶 甘草炙五 右薑棗水煎服 又加味歸脾湯即前方加柴胡山梔

六君子湯即異功散加半夏

十全大補湯 治諸臟虧損氣血俱虛惡寒發熱或自汗盜汗使血吐血或大便不實飲食少思或胸腹

作痛口舌生瘡或耳目不明牙齒不固

人參 白朮 白茯苓 黃芪 當歸 川芎

白芍藥炒 路肉桂 甘草炙五 右薑棗水煎服

八珍湯 治脾胃虧損氣血俱虛乃內傷之症蓋人之生以脾胃為主脾胃一虛諸臟失所百病生焉即

前方大補湯去黃芪肉桂

當歸補血湯 治肌熱躁熱目赤面紅煩渴引飲晝夜不息脉洪大而虛重按全無此脉虛血虛也若候

服白虎湯必死

當歸錢 黃芪瓶一 右水煎服

清胃散 治胃經濕熱牙齒或牙根腫痛或牽引頭腦或面發熱

當歸身酒拌一錢黃連

生地黃酒

升麻略二

牡丹皮五錢

右水煎服

加味清胃散

治脾胃有熱口内生瘡或齒作痛或齧腐爛即前方加犀角連翹甘草

小柴胡湯

治肝膽經症寒熱往來或胸熱潮熱不欲飲食或口苦耳聾咳嗽發熱或脇痛脹滿轉側不便或瀉痢咳嗽嘔吐酸水

柴胡錢

黃芩五錢

半夏錢

人參錢

甘草錢五

右薑棗水煎服

加味小柴胡湯

治婦女經行感冒發熱熱入血室寒熱如瘧晝則安靜夜則發熱妄語或素血虛大勞

大怒火動熱入血室亦能致此即前方加生地黃

當歸六黃湯

治氣血虛而發熱盜汗等症

當歸錢

黃芪炒

生地黃

熟地黃略

黃連炒

黃芩炒

黃柏炒各五分

右水

煎服

黃芩清肺飲

治肺熱而小便不利

黃芩

山梔略

右水煎服不利加鹽豉二十粒

六味丸

一名地黃丸 兩名加減丸 八味丸 桂

治腎虛發熱作渴唾痰小便淋瀝頭暈眼花咽燥唇裂齒不堅固腰腿酸軟自汗盜汗便血諸血失瘕水泛為痰之聖藥血虛發熱之神劑

熟地黃料 新 山 茱 萸 肉

乾山藥略 四 牡 丹 皮

白茯苓

澤瀉略 三

右各另為末和地黃

加煉蜜丸桐子大每服七八十丸空心食前白滾湯下地黃須自製

八味丸

治命門火衰不能生土以致脾胃虛寒飲食少思或臍腹疼痛或多漩瀉即前方加桂附各二兩

加減八味丸即六味丸加肉桂一兩

加減濟生腎氣丸

治脾腎虛腰重脚腫濕飲留積小便不利或肚腹腫脹四肢浮腫氣喘痰甚或已成

水症其效如神

水症其效如神

白茯苓兩

附子兩

川牛膝

桂心

澤瀉

車前子

山茱萸

山藥

牡丹皮兩

熟地黄四兩
酒拌

右為末和地黃膏加煉蜜丸桐子大每服七八丸

空心米飲下

四物二連湯

治血虛發熱或口舌生瘡或晝夜熱

當歸

川芎

芍藥

熟地黄

胡黃連

宣黃連錢一

右作一劑水煎服

白虎湯

治胃熱作渴暑熱尤効

知母錢五

石膏錢四

粳米合

右作一劑水煎服

錢氏益黃散

治脾土虛寒水反來侮土而嘔吐不食或肚腹作痛或大便不實手足逆冷等症

陳皮兩

青皮

阿子肉

甘草錢

丁香錢

右為粗末每服四錢水煎服

二神丸

治脾腎虛弱侵晨五更作瀉或全不思食或食而不化大便不實神効

破故紙兩

肉豆蔻兩

右為末用大紅棗四十九枚生薑四兩切碎同棗用水煮熟去薑取棗

肉和藥丸桐子大每服五十丸空心鹽湯下

人參理中湯

治脾胃虛寒嘔吐泄瀉飲食少思肚腹膨脹

人參

白朮

乾薑炮

甘草錢

右薑棗水煎服

附子理中湯

治脾胃虛寒手足俱冷飲食不入或腸鳴切痛嘔逆吐瀉即前方加附子一錢

四君子湯

治脾胃虛損飲食少思或大便不實肢體消瘦或胸膈虛痞痰嗽吞酸或脾胃虛弱停食而

患瘧痢或瘧痢因脾胃虛而不能愈

人參

白朮

茯苓錢二

甘草錢一

右薑棗水煎服

若因肝木剋脾土而致宜加柴胡芍藥若命門火衰而患宜兼八味丸

異功散即前湯加陳皮治脾胃虛弱飲食少思或久患咳嗽或腹滿不食面浮氣逆等症

人參橋皮湯 治脾胃虛弱氣滯惡阻嘔吐痰水

甘草三分 厚朴製 白茯苓去皮各五分 人參 陳皮 白木 麥門去心各 右用

淡竹茹一握薑水煎溫服

若因中脘停痰宜用二陳枳殼若因飲食停滯宜用六君子加枳殼若因脾胃虛宜用異功散

竹葉湯 治妊娠心驚胆怯煩悶不安名曰子煩

白茯苓 麥門 黃芩略三 右每服四錢竹葉五片水煎服

若因血虛煩熱宜兼用四物若因中氣虛弱宜兼四君

紫蘇飲 治妊娠失調胎氣不安上疔作痛名曰懸

大腹皮 川芎 白芍 陳皮 蘇葉 當歸略一 人參

甘草略半 右薑葱水煎服

若肝脾氣血虛而有火不安宜兼逍遙散若脾氣虛弱而不安宜用四君芎歸

膠艾湯 治妊娠頓仆胎動不安腰腹疼痛或胎上搶或去血腹痛

膠一兩 艾葉數 右二味以水服一錢取二升分三服

阿膠散 或頓仆或因毒藥胎動不安或脇痛腹痛上搶短氣

熟地黃 艾葉 白芍 川芎 黃芪 阿膠 當歸

甘草一兩 右每服四錢薑黃水煎

枳殼湯 治胎漏下血或因事下血

枳殼炒 黃芩祇半 白朮兩 右為末每服一錢白湯調下

二首散 治胎漏下血或內熱脯熱或頭痛頭暈或煩躁作渴或脇肋脹痛等症

生地黃 熟地黃 右為末每服三錢煎白朮枳殼湯下

前四症若因脾胃虛弱宜用補中益氣湯加五味若因脾胃虛陷宜用前湯倍用升麻柴胡若因肺熱內熱宜用逍遙散

知母丸 治妊娠頓仆胎動不安或欲墮產用知母一味炒為末丸梧桐子大每服二十九白湯下或嚼

嚙之

地黃當歸湯治血虛胎動

當歸兩

熟地黃兩

右每服五錢水煎

若因脾胃弱而血虛者宜用四君芍歸氣血俱虛者宜用八珍湯

金生白朮散 治妊娠面目虛浮四肢腫如水氣名曰胎腫

白朮兩

生薑皮

大腹皮

陳皮

白茯苓各半

右各為末每服二錢米飲下

若未應佐以四君子湯

天仙藤散 治妊娠自三月之後足指發腫漸至腿膝飲食不甘狀似水氣或脚指間出黃水名曰子氣

天仙藤洗暑香附炒

陳皮

甘草

烏藥各等

右每服三五錢生薑木瓜各三片

紫蘇三葉水煎食前日進三服

若因脾胃虛弱宜兼六君子中氣下陷須用補中益氣湯

安樂散 治妊娠小便澀少遂成淋瀝名曰子淋

麥門冬法

通草

滑石各二

當歸

燈心

甘草各五

人參

細辛各一

右為末每服二錢煎麥門湯調下

若因肺經蘊熱宜用黃芩清肺飲若因膏梁厚味宜用清胃散若因肝經濕熱宜用加味道遙散

羚羊角散 治妊娠虛風頸項強直筋脉緊急語言蹇塞痰涎不利或時發搐或不省人事名曰子癇

羚羊角錢

川獨活

酸棗仁炒

五加皮各五

薏苡仁

防風

當歸

川芎 茯神 杏仁_{各四} 木香 甘草_{各二} 右每服五薑水煎

若因肝經風熱或怒火所致須用加味逍遙散

安胎飲 治妊娠五七箇月用數服可保全產

白朮 人參 當歸 川芎 熟地黃 白芍 陳皮

甘草 紫蘇 又黃芩_{各一} 右用薑水煎服

若因中氣虛弱須用四君子加陳皮紫蘇若陰虛內熱宜用四物黃芩白朮

二陳湯 治妊娠失調脾胃不和嘔吐痰涎或飲食不思

陳皮 茯苓_{各一錢} 半夏_錢 甘草_{五分} 右薑水煎服脾胃虛弱用六君子氣滯用紫蘇飲

麥門冬湯 治妊娠失於調養內熱口乾或胎動不安

麥門冬_法 防風 白茯苓_{各二錢} 人參_錢 右作一劑水煎服

若血虛有熱用逍遙散氣虛有熱用四君加黃芩紫蘇

鯉魚湯 治胸滿腹脹小便不通遍身浮腫

白朮 茯苓 當歸 芍藥_{各三兩} 右細判用鯉魚一頭煮取汁每藥四錢入汁一

盞半薑七片橘皮少許煎服 若脾胃虛佐以四君子湯

達生散 治妊娠八九月服數劑甚効

大腹皮_{用黑豆汁洗晒三錢} 人參 甘草_炙 紫蘇梗葉 陳皮_{各五} 右水煎入黃楊葉七

莖_{五葉煎服}

春加川芎夏加黃芩冬依正方或有別症以意消息加減

保生無憂散 臨產服之補其血順其氣使易產又治小產瘀血腹痛

白芍藥 只投 乳香 血餘神藥 右等分

每服二三錢水煎日二服

若胞衣既破其血已涸或元氣困憊急用八珍湯斤許水數碗煎熟時飲救之飲盡再制亦有得生

芎歸補中湯 治氣血虛半產

艾葉紙

阿膠炒

川芎

五味子炒

黃芪炙

當歸

白朮炒

芍藥炒

人參

杜仲炒

甘草炙

右每服五錢水煎服

若脾氣虛弱須用補中益氣湯若氣虛而有火宜用安胎飲

人參黃芪湯 治小產氣虛血下不止

人參

黃芪

當歸炒

白朮炒

白芍炒

艾葉各一錢

阿膠炒

右作一劑

水煎服

芸薑散 治孕婦九竅出血或作暈欲死

芸薑子

當歸焙各一錢

芍藥

官桂各半錢

右為末每服三錢以酒并童便各半盞調灌下

立瘥或一味童便溫飲尤効

前二症若脾胃氣虛不能統血宜用四君芎歸中氣下陷補中益氣湯若血脫須補氣為主

當歸川芎湯 治小產後瘀血心腹疼痛或發熱惡寒

當歸

川芎

熟地黃

白芍藥炒

玄胡索

桃仁

紅花

香附

青皮炒

澤蘭

牡丹皮

右水煎入童便酒各小半盞服若以手按腹愈

痛此是瘀血為患宜用此藥或失笑散消之若按之反不痛此是血虛宜用四物參苓白朮若痛而作

嘔此是胃虛宜用六君子若痛而作瀉此是脾虛宜用六君子送二神丸

四物湯 治產後及諸症血虛發熱或口舌生瘡或齒齲腫潰或日晡發熱

當歸

熟地黃各三錢

芍藥炒

川芎一錢五分

右作一劑水煎服

若因氣虛不能生血而患

前症宜補脾胃

加味四物湯即前方加白朮茯苓柴胡丹皮

四神散 治產後血虛或瘀血腹痛

當歸錢

川芎

芍藥炒各一錢

炮薑五

右水煎服

當歸散

治產後氣血虛惡露內停增寒發熱宜服此去之

當歸

白芍炒

川芎

黃芩各一

白朮錢

右為細末溫童便調下二錢

失笑散

治產後心腹絞痛欲死或血迷心竅不知人事及尋常腹內瘀血積血作痛

五靈脂

蒲黃鞣炒

右每服三錢酒煎熱服

若瘀血去多而元氣虛損所致宜用四君芍歸

炮薑

解語湯

治風客心脾舌強不言

附子炮

防風

天麻

酸棗仁各兩炒

右每服二三錢水煎服

若因脾胃風熱用

秦艽升麻湯

抱膽丸

治心驚不語或癩癩等症

水銀兩二

黑鉛錢五

硃砂細研

乳香各兩研

右將鉛入銚下水銀成砂次下硃砂乳香乘

熱用木槌研勻丸鷄頭大每服二丸

若因心氣虛用妙香散

二母散

治產後惡露上攻留於肺經咳嗽喘促

知母

貝母

白茯苓

人參

桃仁

杏仁並去皮尖各一兩

右每服五錢薑

水煎

若瘀血既去而嗽仍作宜補中氣

二味參蘇飲

治產後瘀血入肺咳嗽喘急

人參

蘇木

右作一劑水煎服

若恍惚宜當用六君子以補脾胃若口鼻黑氣起急用

此藥加附子五錢亦有得生者

清魂散 治產後元氣虛瘀血逆行作暈

澤蘭葉

人參略一

荆芥穗兩

川芎兩

甘草錢八

右為末熱湯溫酒各半調下二錢

若因瘀血去多宜四物加參苓白朮不應血脫也急補其氣

硃砂安神丸 治產後血暈心神驚悸等症

硃砂飛過五錢

生地黄半錢 黃連酒洗六錢

甘草錢五

當歸五錢

右為末飯糊為丸每服十五丸

若因中氣虛宜用四君芍歸兼思慮傷脾須用歸脾湯

奪命丹 治瘀血入衣胞脹滿難下急服此藥血即消衣自下

附子炮兩

牡丹皮兩

乾漆炒兩 燂令燂盡

右為細末好醋一升大苜末一兩同熬成膏和藥丸如

桐子大溫酒吞五七丸

花藥石散 治胎衣不下其効如神及打撲傷損腹中瘀血脹痛欲死服之血化為水其効不能盡述

硫黃上兩 明淨者

花藥石為兩 燂末

右二味相拌和勻先用紙筋和益泥固濟瓦罐于一箇

候泥乾入藥再用泥封口候乾安在四方磚上虛書八卦五行字用炭三十斤周疊煨之候冷取出為

細末每服一錢童便調下

平胃散 治腸胃寒受濕下血等症

蒼朮

厚朴

陳皮

甘草錢

右薑棗水煎服

益母草丸 五月採陰乾石器為末煉蜜丸彈子大臨產以童便和溫酒化下

加味芍歸湯 治分娩交骨不開或五七日不下垂死者

生男女婦人髮一握燒

川芎

當歸各一

自死龜殼一箇 如死占過

右為末每一兩水

煎服良久不問生死胎自下

芎歸湯 治產後去血過多。暈煩不省。用川芎當歸二味等分。每劑半兩水煎服。

若腹疼加桂腹痛。自汗頭眩。少氣加羊肉。若不應用八珍湯。

七味白朮散 治中氣虛口乾。或吐瀉等症。

人參 白朮 木香 白茯苓 甘草 藿香 乾葛錢一 右作一

劑水煎服

選奇湯 治風熱上壅。肩稜骨痛。或頭目眩暈等症。

羌活 防風錢二 甘草二錢 夏酒冬去之 右每服三錢水煎時時飲之。

葛花解醒湯 治酒積上下分消其濕。

白豆蔻 砂仁 葛花錢五 木香錢五 青皮錢三 陳皮 白茯苓

猪苓 人參錢半 白朮 神麴炒 澤瀉 生乾薑錢二 右為細末每服五

錢白湯調下。

藿香正氣散 治外感風寒內停飲食。頭疼寒熱。或霍亂泄瀉。或作瘧疾。

桔梗 大腹皮 紫蘆 茯苓 白芷 半夏麴 陳皮

白朮 厚朴製各錢 甘草錢五 藿香錢五 右作一劑薑棗水煎熱服。

清燥湯 治元氣虛濕熱乘之。遍身痠軟。絕寒水生化之源。小便赤少。大便不調等症。

黃芪錢五 五味子炒 黃連 神麴炒 猪苓 柴胡 甘草錢二 各

蒼朮 麥門冬 陳皮 白朮 生地黃 澤瀉錢五 白茯苓

人參 當歸 升麻錢三 酒相分 右作一劑水煎服。

人參養胃湯 治外感風寒。內傷飲食。寒熱頭疼。或作瘧疾。

半夏 厚朴製 橘紅心 藿香葉 草朮 茯苓 人參錢五

甘草分三 蒼朮錢 右作一劑薑七片烏梅一箇水煎服

大防風湯 治足三陰虛患鶴膝風歷節痛風等症不問或腫而不痛或清未乾

附子炮去皮一錢 白朮炒 羌活 人參錢二 川芎一錢五分 防風錢二 甘草錢

牛膝略浸一錢 黃芪錢二 當歸酒拌二錢 白芍藥錢二 杜仲姜製二錢 熟地生者 右作二劑水煎服

獨活濟生湯 治鶴膝及歷節痛風等症

白茯苓 杜仲 當歸酒洗 防風 白芍藥 人參 細辛

桂心 熟地黃 牛膝 秦朮 芍藥 桑寄生 甘草略二

獨活三 右每服一兩薑水煎

羌活勝濕湯 治痛風血虛腫痛身重脉緩等症

羌活 獨活去蘆一錢 藁本 防風 川芎 甘草錢 蔓荊子各五 右作

一劑薑水煎服

附子八物湯 治歷節作痛發熱作渴飲食少思等症

附子炮 乾薑炮 芍藥炒 茯苓 人參 甘草錢略一 肉桂錢

白朮錢 右作一劑水煎食前服

四生散 治膝腿生瘡或癬疥等症

白附子 黃芪 羌活 沙苑蒺藜 右各等分為末每服二錢用猪腰子批開入藥

濕紙包裹煨熟細嚼鹽湯下風濕酒下

妙香散 治心脾虧損大便下血又治心氣不足精神恍惚少睡盜汗

人參 桔梗 甘草錢五 遠志法 山藥姜汁 茯苓去皮 黃芪各一

辰砂三錢 麝香另錢 木香錢二 茯苓錢二 右為末每服二錢溫酒調服

漏蘆散 治血風走注作痛無定處

漏蘆

當歸

牛膝各三

桂心

地龍去

防風

羌活

白芷

沒藥研

甜瓜子略半

虎脰骨酥

敗龜板炙

右為細末每服二錢熱酒調下

補中益氣湯

治元氣不足四肢倦怠口乾發熱飲食無味或飲食失節勞倦身熱脉洪大而無

力或頭痛發熱或惡寒自汗或氣高而喘身熱而煩

黃芪錢

甘草錢

人參

當歸酒炒

白朮炒

升麻

柴胡各三分

陳皮一錢

右薑枣水煎服